


KIDIMBU YA NZAMBI

 . . .? . . .kaka mutindu ya ntama yina beto vwanda kuzwaka bamvula mingi me luta, mpe beto ke vutula matondo mingi samu na yawu. Mpe mu me sepela mingi na nkunga yankaka yina, bankunga nyonso, mpe yina bantu me yimba bawu mosi. “Ntangu mu me baka kilometele ya nsuka ya nzila, kupema na nsuka ya kilumbu.” Ya kele kisika yina, mu banza, na kuvwandaka kaka awa, na yina bawu vwandaka yimba yawu, vwanda tala mpe kumona mwini mutindu ya ke na kukotaka; bandeke nyonso kuyimba na yisi mpe malembe, nyonso ke na kumana ntangu yayi mpe bawu me kwenda pema, mbasi na suka kuvumbuka samu na kilumbu ya malu-malu.

² Mpe ya kele mutindu ya kele na luzingu; na ntangu fyoti bantangu ya kusala ke luta, mpe beto ke lala na kiti ya beto ya bibombi. Mu ke zola kuzonza na Yandi kilumbu yina, kaka kuzonza na Yandi. Mu ke kutika bilele ya munu pene-pene ya munu, mpe kukota na kivinga.

³ Na kuzabaka yayi, mutindu Santu Paul tubaka na ntama, “Mu zaba Yandi na Ngolo ya mvumbukulu ya Yandi.” Ti, ntangu Yandi ke bokila na kati-kati ya bantu ya kufwa, ba ke bokila munu na kubasika na bawu. “Na kuzabaka Yandi na Ngolo ya Yandi ya mvumbukulu.” Na kuzabaka Yandi ve na nzila ya ndinga to na nzila ya bisalu, kasi na kuzabaka Yandi na Ngolo ya Yandi ya mvumbukulu. Yina kele mosi ya beto—ya bivuvu ya beto ya nene na nkokila yayi, mpe kivuvu mosi kaka yina beto kele na yawu, kele na . . .mvumbukulu ya nene yina ya Mfumu ya beto Yesu; mpe mvumbukulu ya beto ya ntete kele na beto ntangu yayi, kukatuka lufwa na Luzingu, na kuzwaka Luzingu ya Seko na nzila ya Yesu Klisto.

⁴ Kuingila, mpe kuingila ya nkembo, ya yinza ya muvimba, tii kilumbu yina ntangu Yandi ke kwiza na mbala ya zole, na kukatukaka Mazulu, Yina Nzambi ke tinda na nsungi ya kulunga. Mpe kuna banzutu yayi yina ke kufwa, na yina beto ke yawula ntangu yayi, ke baka yina ke kufwa ve, “Mpe beto ke soba mpe ke kuma mutindu nzutu ya Yandi Mosi ya nkembo, samu ti beto ke mona Yandi mutindu Yandi kele.”

Na yina disumu mpe kyadi, disumu mpe lufwa ya yinza yayi ya mpimpa ke suka,

Na kimfumu yayi ya nkembo na Yesu bamvula funda mosi ya ngemba.

⁵ Bandeke ke na kuingila yawu. Bayinti ke na kuingila yawu. Yinza ya muvimba ke tengama mpe ke dila, na kuingilaka ntangu yina, ke yawula na kuzwa ya kufuka.

⁶ Mwa mwana ya munu ya kento, ntama mingi ve, yufulaka munu kyuvu mosi. Yandi tubaka, “Papa, wapi mutindu vwandaka ntoto yayi ntangu Nzambi manisaka na yawu?”

⁷ Mu tubaka, “Ya vwandaka kitoko, cherie. Ya vwandaka kitoko.” Mpe mu tubaka, “Ya ke vwanda dyaka kilumbu mosi mutindu yina, ntangu ba ke katula nsingulu. Mpe kuna beto ke. . . Ya ke vwanda mutindu ya vwandaka na mbandukulu, paladiso ya nene ya Nzambi.”

⁸ Ntangu yayi, mbala mosi na kisalu. Mu vwandaka banza ntangu yayi, nkokila ya ntete. . . Yayi kele nkokila ya tatu ya reveil ya beto ya fyoti. Mpe beto me kuzwa ve campagne ya kubeluka ya nzutu. Ya kele kaka samu na kupema, kaka mitindu na kulakisa basentima ya beto, mpe kulonga Nsangu ya mbote na mutindu ya ntama; Nsangu mosi ya mbote yina mu longaka awa, bamvula mingi, mingi me luta, mu me soba mosi ata fyoti ve. Ya kele kieleka, kaka Nsangu mosi ya mbote, ata fyoti ve kukumisa malu-malu to kupakula; kaka Nsangu mosi ya mbote.

⁹ Na balukutakanu kuna na ngaanda, na kuvwandaka tabernacle yina ke yambaka bantu nyonso, mutindu ya ke vwandaka na bivinga mpe ti ba-denomination mingi ya bantu ke vukanaka kintwadi, beno ke bika fyoti Malongi; nyonso kasi ve kubeluka ya Kinzambi, mpe, ya kieleka, kundima Mfumu Yesu. Kasi na ntangu beno kele na yinzo ya beno, mutindu na dibuundu ya yinzo yayi awa, beno ke kuwa kaka mutindu ya kukatula nkingu ya beno, mpe kulonga kaka pwelele yina beno ke banza kele kieleka, mpe ya kele mutindu yina.

¹⁰ Mpe bambala mingi, na kati awa, beto kele, na bambala mingi, bantu ke ndimaka ve. Beto lenda vingila ve ti muntu nyonso kuwisana na beto na Malongi ya dibuundu ya beto mpe mambu yina beto kele na yawu. Kasi beto lendaka vwanda mu banza kima mosi, mutindu pasteur ya beno vwandaka longa, kasi yandi ke vwanda kaka mpangi ya munu ya bakala. Beno tala yawu ve. Mpe muntu nyonso ke talaka mambu mutindu na mutindu.

¹¹ Mpe sabala yayi, na kumonaka ti mu lungaka kufwa sabala mosi na Canada, samu na mipepe ya ngolo ya mvula ya mpembe, mbote, ya ke pesa munu bweso ya kukwiza awa, na tabernacle, samu na mwa bankokila ya reveil, yina mu silaka ntangu mu kwendaka. Mpe mu samunaka yawu, ti ya ke vwanda. . . “na lukutakanu ya kubeluka ya nzutu ve; kaka kulonga Nsangu ya mbote.” Kaka. . . Mpe samu na yayi, mu me mona, mu banzaka ti beto lendaka baka mwa bankokila na zulu ya Bansungi Sambwadi ya Dibuuundu. Samu ti mu ke kwikila ya kieleka ti beto ke na kuzinga na nsungi ya nsuka ya dibuundu, na kilumbu ya nsuka, kaka na ntuala ya Nkwizulu ya Mfumu Yesu.

¹² Mu ntangu nyonso ke mekaka na kuteza kutuba ya munu mosi, dibuundu ya fyoti awa, na nyonso mu ke zonzaka, samu

ti Mfumu ya mbote ya Mazulu me pesa munu mwa ndambu ya ministele, mpe, na lweka ya kimpeve, mutindu beno zaba. Mpe bantu ke kangama na ndinga ya beno, mpe—mpe na yawu mu—mu fwana sala keba na yina mu ke kutuba. Samu ti, kana Mpeve-Santu me pesa ngolo yayi ya ba-vision mpe kuswasikisa mabanza, yina kele ya kusala ntembe ve, mpe bawu ke kuwa beno kuzonza, bawu ke kuwa ti beno kele na dibanza mosi na yina beno ke na kuzonzila, to Nzambi ke sakumuna ata mbala mosi ve kyeta mpe ke mwangisa ve yawu mutindu yina. Beno me mona? Na yawu beno fwana sala keba mingi, mpe kuteza yawu na nsemo ya Ndinga, ntangu nyonso. Mpe na kati ya yawu, kana mu sala kyeta, mu ke sambila Nzambi kulemvokila munu, samu ti mu me yindula ve. Mpe mu . . .

¹³ Mpe ntangu nyonso, na malongi, mpe mingi-mingi na malongi ya mudindu mutindu yayi na kati ya yina beto kele ntangu yayi, mpe mazono na nkokila na *Kidimbu Ya Kibulu*, mpe malongi ya mutindu yina, mpe na nkokila yayi na *Kidimbu Ya Nzambi*, kinyemo ya Nzambi, mpe nyonso ya mutindu yina, Mu ke tala ti ya lendaka vwanda, mu banza ti mingi ke wisana ve na yayi, na yina mu ke longaka na zulu ya yawu. Kasi mu ke meka na kusala yawu kaka mutindu . . . na kutwadisaka Yawu ve na dibuundu mosi, na denomination mosi, to na bantu mosi, mutindu nyonso yina ve. Nzambi zaba yawu. Kaka na Nsemo yina mu ke mona yawu, ya kele mutindu mu ke zonzila yawu.

¹⁴ Mpe ya kele ve na dibuundu yina ke bokilaka Nkumbu ya Mfumu Yesu ti mu ke zolaka ve. Ya kele ve na muntu yina lenda bokila Nkumbu ya Yandi, to yina kele na buzitu na Yandi, ti ve tii na lufwa mu ke kwenda na kusala kima mosi samu na bawu. Ya kele kieleka. Ata kidimbu ya lukwikilu bawu ke lwata, ata ti ya kele Methodiste, Baptiste, Katolika, ata nyonso yina ya lenda vwanda, yina ke talisa munu dyambu ve, ya kele kieleka, ntangu nyonso bawu ke vwanda na buzitu na Mfumu ya munu.

¹⁵ Kasi, ntangu yayi, ya kele na Kifwanusu. Mpe ntangu yayi konso dibuundu ke longa, mu banza, yina kele théologie ya bawu ya dibuundu yina, na kukwikilaka ti ya kele na zulu ya Kifwanusu. Mbote, ntangu yayi, bambala mingi, na kumonaka bima yina, yina ya kele ve kaka mutindu mu ke tanga Kifwanusu, na yawu kuna mu kele na muswa na dibuundu ya munu mosi na kulakisa yina mu banza kele kieleka.

¹⁶ Awa ntama mingi ve, kitungi mosi . . . Mu vwandaka na Milltown, na dibuundu ya Baptiste ya Milltown, kisika beto kuzwaka réveil. Mpe Mpangi Wright mpe beno nyonso, mu banza, ke bambuka moyo na Marion Lee. [Mpangi George Wright me tuba, “Amen.”—Mu.] Mpe yandi vwandaka kieleka ya kunyonga na kima mosi mu longaka na zulu ya mbotika ya maza. Mbote, yandi kwendaka na yinzo, mpe yandi vwandaka ya kunyonga samu na yawu. Mpe yandi vwandaka kitungi.

¹⁷ Na mpimpa yina yandi lotaka ndosi. Mfumu talisaka yandi ti yandi vwandaka tunga yinzo, mpe yandi vwandaka tula nela mosi ya bizizi tatu. Mpe na yawu na kisika ya kutula nela ya bizizi tatu na yawu, yandi tulaka kaka vlanda, yandi me tuba, “Ya ke vwanda nyonso mbote.” Na yawu ntangu mfumu ya yinzo kwizaka, yandi tubaka, “Mwangisa yawu tii na fondasio; banda dyaka.”

¹⁸ Na yawu ba longaka yandi kima yankaka na yina Biblia vwandaka longi, na yawu yandi tubaka, “Mu ke sala kaka mbote na kumwangisa fondasio mpe kutunga yawu dyaka.” Mu kwendaka na yinzo na yandi na nkokila yina, vwandaka mpimpa ya muvimba na yinzo ya yandi. Samu ti kuna beto . . .

¹⁹ Ya kele kieleka. Ya fwana vwanda. Mpe, na kulongaka malongi yayi, mu kele mulongisi ve. Kasi na yina mu zaba na Yawu, mu ke zolaka kubangula Yawu na bayankaka, mpe kubundana na nziunga ya Ndinga, na yina Mpeve-Santu ke sala Yawu ya kieleka na ntima ya beto. Mpe na yawu beto kele kaka na ntangu ya nene na kusala yawu.

²⁰ Mpe ya kele kaka mutindu ya kupemisa pasteur ya beto ya luzolo awa, Mpangi Neville. Kana ya kele na banzena na kati ya beto; bakala, *yayi awa*, ya kele pasteur ya beto, Mpangi Neville, muntu ya Nzambi, kisadi ya kieleka ya Mfumu Yesu Klisto. Mu ke tuba yawu ve samu ti yandi kele ya kuvwanda awa. Mu ke tubaka yawu na manima ya yandi, to kisika nyonso, yandi me vwanda mutindu yina kubanda mu me zaba yandi. Yandi vwandaka kieleka Méthodiste, mpe mu vwandaka kieleka Baptiste, kasi beto vwandaka bampangi ya babakala kintwadi, mpe na yawu beto zole balukaka samu na kuvwanda ba-exalté. Mbote mingi, mutindu yina ve, mpangi ya bakala? Amen. [Mpangi Neville me tuba, “Amen. Aleluya!”—Mu.] Na yina beto kele ya kutelama na ntoto mosi.

²¹ Mbote, beto, beto ke na kuzwa ntangu mosi ya mbote na mutindu yayi, “Beto ke kuzwa kaka kubundana mosi na yankaka, na yina Menga ya Yesu Klisto, Mwana ya Nzambi, ke sukula beto na masumu nyonso ya nko.” Na yawu beto ke na kuzwa ntangu mosi ya nene, mpe ya kieleka beto me sepela na kuzwa banzena na kati ya beto, na nkokila yayi, awa.

²² Mwa reveil ya beto yayi, mu banza ti beno me kukiyufula samu na yinki ba me samuna yawu ve. Mbote, ya vwandaka kaka mwa ntangu ya jubilé samu na dibuundu ya beto awa, mpe ya kele samu na yina beto na kutala mu banza . . . Mu zaba ve mutindu Mpeve-Santu ke twadisa, kasi mu banza nkokila mosi, ntete beto sukisa awa, beto lendaka kuzwa lukutakanu ya kubeluka ya nzutu, kana Mfumu zola. Mpe na yawu mu ke tula kivuvu ti Yandi ke pesa yawu.

²³ Mu fwana vutuka na Canada ntangu yayi, samu na kulandila na ba-reveil. Mpe mutindu bantu nyonso zaba, beto kele na

baploglame mingi, ya kifuluka tii ntangu beto ke kwenda na bayinsi ya nzenza. Mpe nyonso me kubama yimeni, samu na kubanda na Durban, na Sude . . . na Johannesburg, na Afrika ya Sude, na Ngonda ya yivwa, pene ya kilumbu ya tatu. Mpe na manima beto ke katuka kuna na kulandila na Durban; mpe na Inde; mpe na Palestine; mpe na Luxemburg; mpe na Frankfurt; mpe na Transjordan; mpe bisika nyonso kuna. Kuvutuka na yinzo ntangu Mfumu ke twadisa beto, ntangu Yandi ke tuba na beto na kuvutuka. Mpe ba ke na kukubikaka nzyetolo yankaka na Nouvelle-Zelande mpe na Australie, mpe kuna na kati, mpe na lweka kuna; mpe kuna na esete, na Japan, mpe bayinsi yina kuna.

²⁴ Mu ke tala ti mabuundu mingi na nziunga awa, kisika bantu, oh, la la, ke salaka kaka mutindu ya proselyte, mosi na yankaka, mpe, na yina, mafunda ya bantu me kuwaka ntete ve mbala mosi na Yesu. Mpe na yina mu ke tala ti . . . Ya kele mutindu ya munu ya kutala, muntu mosi, ya kele kisalu ya munu na kunata Nsangu na bawu, ya kulutila mbote yina mu lenda. Mpe ntangu yayi mutindu mu . . .

²⁵ Beno bika mu tuba dyaka ntangu yayi, samu ti, ba kele ya kuvwanda awa, ba-Methodiste, ba-Baptiste, bantu ya Katolika, ba-Presbyterien, ba-Pentecotiste, Bizieti ya Busantu, ba-Nazaréen, ba kele ya kuvwanda awa, mpe ya kele na yina beto kele . . . Mu ke kwikila ti ya kele mutindu Mazulu ke vwanda, na kuzola kutuba, nkonga ya beto ya muvimba ya kuvwanda kuna.

²⁶ Mpe ntangu yayi na bansangu yayi, mutindu *Kidimbu Ya Kibulu*, mpe bubu yayi na yina ya kele na poto-poto mingi . . . Beno bakulaka yawu, mazono na nokila? Kana beno bakulaka yawu, beno tuba, “Amen.” [Dibuundu me tuba, “Amen.”—Mu.] Ntangu yayi beto ke zonzila na nokila yayi na kinyemo ya Nzambi, to, *Kidimbu ya Nzambi*. Ntangu yayi beto ke bakula . . .

²⁷ Ntangu yayi, mu ke sosa ve na kulonga na Babiblia zole; mosi me lunga. Kasi mu kele na mosi ya yawu awa samu na lukanu mosi samu na mwa banoti na yisi, mpe nyonso yina, ya kutala, kana muntu lendaka pesa kyuvu. Mpe ntangu yayi, mbasi na nokila, kana Mfumu zola, na manima ya kulunga . . .

²⁸ Nokila ya ntete, na *Bansungi Sambwadi Ya Dibuundu* na kumonaka kisika beto vwandaka, beto kele, landila ntelamanu, na kilumbu yina beto ke na kuzinga.

²⁹ Mazono na nokila, na zulu ya crime ya kulutila nene yina kele na yinza, *Kidimbu Ya Kibulu*.

³⁰ Mpe, na nokila yayi, na zulu ya lusakumunu ya kulutila nene yina kele na yinza, *Kidimbu ya Nzambi*.

³¹ Mbasi na nokila, mu ke pesa beno siansi ya kukubula munu, awa. Mbasi na nokila ke vwanda bakyuvu, mpe bima yina beno ke bakula ve landila yina me longama. Beno me vwanda ba-gentlemen mpe bamama ya kulunga, to Miklisto ya kulunga, mu

ke tuba, samu na ngemba ya beno na ntangu ya balukutakanu. Mu zola ti beno sonika, mbasi na nkokila ntangu beno ke kwiza na dibuundu, mpe beno kwiza kaka na ntangu ya mbote mutindu beno lenda, samu ti mu fwana kwiza na ntangu ya mbote samu na kutanga mpe mutindu samu na kupesa yawu mvutu, na yina kele kyuvu ya beno landila Masonuku.

Mpe Lumingu na suka kele lukolo ya Lumingu ya mutindu ntangu nyonso.

³² Lumingu na nkokila, mu banza Lumingu na nkokila, ya ke vwanda na lukutakanu ya mbotika. Ya kele na mwa bantu ba ke botika. Mpe dyaka Lumingu na nkokila, beto lendaka mu banza, kuzwa nsangu ya Nsangu ya mbote to lukutakanu ya kubeluka ya nzutu. Beto ke mona mutindu yina Mfumu ke twadisa beto na nkokila yina, samu na Lumingu na nkokila, nsangu ya yawu.

³³ Ntangu yayi beto ke tala, ntete beto belama na yayi, ti, “Ya kele na muntu ve na Mazulu, muntu ve vwandaka na zulu ya ntoto, to muntu ve na yisi ya ntoto, vwandaka ya kulunga samu na kubaka Buku, to na kuzibula Yawu, to na kunyangula Bidimbu ya yawu.” “Muntu ve!” Jean monaka yawu na Apocalypse. Mpe beto ke na kulongaka Apocalypse ntangu yayi. “Mpe Jean dilaka. Kasi ya vwandaka na Mwana-dimeme yina ba kufwaka, kubanda mbandukulu ya yinza; Yandi vwandaka ya kulunga na kukwiza mpe kubaka Buku na diboko ya kibakala ya Yandi yina vwandaka na zulu ya Kiti ya kimfumu, mpe na kuzibula Buku, mpe na kunyangula Bidimbu ya yawu.” Mpe Mwana-dimeme yina, ya kieleka, vwandaka Yesu Klisto, Mwana ya Nzambi. Mpe ntangu yayi kana Yandi kele Yandi yina kaka kele ya kulunga . . .

³⁴ Yandi zingaka awa kilumbu mosi na beto, na zulu ya ntoto, na nzutu ya Muntu. Nzambi zingaka na kati ya Mwana ya Yandi, Klisto Yesu, mutindu Muntu-Nzambi.

³⁵ Mpe Yandi vutukaka na Nkembo, na kubikaka Ndinga yayi, “Na mwa ntangu fyoti mpe yinza ke mona dyaka Munu ve. Kasi, beno ke mona Munu, samu ti Mu ke vwanda na beno, mpe na kati ya beno, tii nsuka ya yinza.” Muntu Mpeve-Santu, Nzambi, na kuvutukaka na nzutu yina Yandi . . . Yesu tubaka, “Mu me katuka na Nzambi; Mu ke kwenda na Nzambi.” Yandi basikaka na Seko, kotaka na ntangu; basikaka na ntangu, vutukaka na Seko.

³⁶ Mpe yinza zabaka Yandi ve. “Yandi vwandaka na yinza, yinza kusalamaka na nzila ya Yandi, mpe yinza zabaka Yandi ve. Kasi mutindu bantu mingi ndimaka Yandi, bawu . . . me pesa bawu ngolo ya kukuma bana ya Nzambi.”

³⁷ Mpe, ntangu yayi, awa Yesu Klisto kele na beto, “Dyaka ntangu fyoti mpe yinza ke mona Munu dyaka ve, kasi beno ke mona Munu.” Ntangu yayi ya ke vwanda na yinza yina ke mona Yandi ve, mpe ya ke vwanda na *yandi* yina ke mona. “Samu

Mu,” *Mu* kele kiyingilu ya muntu, “Mu ke vwanda na beno, mpe na kati ya beno, tii nsuka ya yinza. Mpe beno,” mukwikidi, “ke mona Munu mbala mosi tii nsuka ya yinza.”

³⁸ Hebreux 13:8, me tuba, “Yesu Klisto kele mutindu mosi mazono, bubu yayi, mpe ntangu nyonso.” Beno tala Yandi mbote na ngolo ya Yandi, Mfumu Yesu mosi, zola mosi, mambu ya ngitukulu ya mutindu mosi, bidimbu ya mutindu mosi yina vwandaka landa Yandi, ke landila kaka tii na nsuka. Yandi kele na Nzutu ya misitiki ntangu yayi, Nzutu ya bantu me vumbuka, na disumu na Luzingu. Yandi ke zinga na kati ya bawu.

³⁹ Nzambi na Nkembo ya Yandi ya nene, Nzambi na kukikulumusaka, me katuka Dikunzi ya Tiya, muntu mosi ve zolaka simba, me kulumuka na nzutu ya muntu kisika yandi zolaka simba, kasi Yandi butukaka na mwense. Na yina, kuna, na kupesaka luzingu ya Yandi samu ba koma Yandi na kulunsi, samu na kusukula muntu na disumu, mpe Yandi zolaka zinga na kati-kati ya bantu. Wapi zola ti Nzambi kele na muntu, ti Yandi me funguka Yandi mosi, samu na kusala nzila ya kuvedila yina Yandi lendaka zinga mpe kuzola na kati-kati ya babakala mpe bakento. Ya kele kitoko. Yinga. Ya kele Tata ya beto.

⁴⁰ Bika beto zonza na Yandi kaka ntangu yayi, Mfumu ya Buku, ntete beto zibula bapaze.

⁴¹ Tata ya beto ya mbote ya Mazulu, beto me kwiza na Nge, na nkokila yayi, na mutindu yina ba silaka beto, “Kana beno lomba Munu kima na Nkumbu ya Munu, ti Mu ke sala.” Na yawu beto kele na ludedomo ve, beto kele na kima mosi ve yina beto lenda pesa, beto me kwiza kaka na Nkumbu ya Mfumu Yesu, na kuzabaka ti Nge silaka na kuwa na nzila ya Nkumbu yayi.

⁴² Na yina beto ke lomba Nge, na kuzabaka ti beto kele awa, na kutala mbote na nkokila yayi, mosi ya malongi ya kulutula nene ya kilumbu, *Kidimbu Ya Nzambi*. Tata, beto ke sambila, Mfumu, na kuzabaka ti mwa kimvuka yayi ya bantu yina me vukana awa, kana mu twadisa bawu yimbi, Mu ke pesa mvutu samu na yawu na Kilumbu ya Lusambusu. Mpe mazono na nkokila, na, *Kidimbu Ya Kibulu*. O Tata, beto ke sambila ti Nge kutwadisa mpe kusungika Bandinga yayi. Ti Yawu kuvutuka mpamba ve, kasi ti Yawu kulungisa kikuma ya Yawu na ntangu Yawu sonamaka na kati ya Buku.

⁴³ Mpe ntangu yayi kwiza, Muntu ya Santu, baka mbala mosi Ndinga ya Nzambi na Biblia, zonzila Yawu na nzila ya bikoba yina ke kufwa, na makutu ke kufwa, mpe vedisa nyonso zole yina ke zonza mpe yina ke kuwa, ti beto lendaka lungisa kima na nzila ya kuvukana kintwadi yayi, na nkokila yayi; na kuzabaka ti ya lendaka vwanda na bayankaka awa, kana yinza vwanda dyaka mvula yankaka, ke vwanda ve bantu yina ke kufwa na zulu ya ntoto.

44 Mpe ntangu yayi beto kele na yinzo ya kusungika, na yinzo ya Nzambi, kisika beto fwana ndima kusungika. Mpe ti Mpeve-Santu kusungika munu, mpe kukanga yinwa ya munu, mutindu Nge salaka yinwa ya bankosi, na Daniel. Mpe Nge zaba ntima ya munu, kana mu ke zonza ndinga mosi na mutindu yankaka to na munu mosi. Bika ti Mpeve-Santu kupakula konso Ndinga. Mu ke telama kaka mutindu vaze ya mpamba; mpe ti Yandi zonza Ndinga ya Nzambi, na nokila yayi, samu bantima ya beto ya nzala ke na kovingila na kuwa Yandi. Mpe ti Yandi, Yina sonikaka Biblia, kwiza mpe tendula Yawu na bisadi ya Nge ya kulemvuka awa. Beto ke lomba yawu na Nkumbu ya Yesu. Amen.

45 Ntangu yayi samu na mwa dibanza, na kubanda na nokila yayi, na, *Kidimbu ya Nzambi*.

46 Beno zimbana ve, mbasi na nokila, beto zola ti beno nata kyuvu ya beno. Mpe beno sonika yawu pwelele, mpe beno tula yawu na estrade, na ntangu ya mbote, to na zulu ya chaire, na ntangu beno mutindu beno lenda. Ntangu yayi dilongi yayi ya nene beto kuzwaka mazono na nokila . . .

47 Na nokila ya ntete, na ntwala ya mazono, ya vwandaka Dibuundu mpe nsungi ya dibuundu, mutindu beto monaka Yesu ya kutelama na kati-kati ya Minda Sambwadi ya Wolo, vwandaka talana mutindu jaspe mpe sardoine, mbandukulu mpe nsuka, Ruben mpe Benjamin. Beno me mona minda sambwadi, to makulu sambwadi ya minda ya kutelama, mpe mukyama na zulu ya yawu, mutindu ngwisani, mpe mutindu Yandi vwandaka monika. Mpe Ndinga ya Yandi vwandaka Ndinga ya bamaza mingi, nyonso zole Klisto mpe Dibuundu, na kuzonzaka kintwadi; na nsinga ya luketo ya wolo na zulu na lweka ya ntulu ya Dibuundu, ya kufuka, na kusimbaka, Nsangu ya mbote na kusimbaka ludedomo ya Klisto na zulu ya Dibuundu. Vwandaka ya kutelama na zulu ya lufulu ya kisengo, lusambusu ya Kinzambi; Nzambi tsyamunaka lusambusu ya Yandi ya Kinzambi na zulu ya Klisto, mpe Yandi talaka mpasi, muntu yina zabaka dyambu ve samu bantu yina zabaka dyambu.

48 Mpe beto monaka mutindu ya bandaka na dibuundu ya Éphèse; na manima nsungi ya zole ya dibuundu; nsungi ya dibuundu ya tatu; nsungi ya dibuundu ya yiya, bankama kumi na tanu ya bamvula ya bansungi ya mpimpa; me luta na Nsungi ya Luther; mpe Nsungi ya Philadelphie; mpe tii na Nsungi ya Laodicée, nsungi ya nsuka.

49 Beto monaka na Ngwisani ya Ntama, mutindu ba vwandaka fwanikisa na mutindu ya kulunga na mbandukulu, na Salomon, tii kuna na ntangu ya Achab, nsungi ya mpimpa. Mpe beto monaka, mutindu Jezabel, Achab, mulongi na ndilu ya nzila, to muntu yina vwandaka na kati mpe na ngaanda. Kaka mutindu bamambeke mingi ya dibuundu yina kele tiya ve madidi ve bubu

yayi, bantu, yina kele na kati mpe na ngaanda; na dibuundu bubu yayi, mbasi beno lenda tala bawu kisika nyonso; ke vukisa na yankaka, ke vutuka manima, ke kwenda na yinza, kasi ke kukibokila bawu mosi Miklisto. Mpe Achab, na kondisyo yina, kubwaka samu na mwa kento mosi ya kitoko, ata ti yandi vwandaka muntu ya yimbi na nyonso. Mpe kwelaka yandi, mpe yandi kotisaka bisambu ya biteki na Israel, kaka na ntangu ya mpimpa mingi ya Israel, nsungi ya mpimpa. Ntangu yayi, beto ke tala ti bawu basikaka kuna na lufulu ya kisengo, mpe landilaka na kubasika, mpe na nsuka kumaka tiya ve madidi ve, tii Nzambi lukaka bawu na yinwa ya Yandi mpe ndimaka Bantu ya makanda.

⁵⁰ Mpe ntangu yayi beto ke tala ti bawu bandaka na ya ntete, Dibuundu ya Éphèse, na mbandukulu, na nsungi ya dibuundu; nsungi ya dibuundu yina landaka bandaka na kukuma madidi mpe kukuma tiya ve madidi ve; landilaka mutindu yina, mpe tii na nsungi ya mpimpa. Mpe kaka mutindu—mutindu kilumbu yina, Achab na kukwelaka musambidi-biteki, Jezabel, mpe yandi nataka bisambu ya biteki na Israël; mutindu mosi bu-Protestant me kwela Romanisme, Katolisisme, mpe me kotisa bisambu ya biteki na dibuundu. Me luta na Martin Luther; John Wesley; tii na Pentecote; mpe kuna, mpe Nzambi basisaka bawu na yinwa; mpe Nzambi ke baluka dyaka na ba-Juif, kaka ya kulunga.

⁵¹ Ntangu yayi, mu zaba ti mu kele. . . Beno ke tuba, ntangu yayi, mu kele typologue. Ya kele kieleka. Samu ti, mu—mu zaba kima mosi, kana mu ke kwenda na ntwala ya kivudi ya munu mpe mu ke mona mutindu kivudi ya munu kele, Mu kele na dibanza ya mutindu yina mu kele; ata ti mu kele kibulu ya makulu yiya, to ndeke ya kufuluka mapapu, to nyonso yina ya kele, ya kele kivudi.

⁵² Mpe Ngwisani ya Ntama vwandaka kivudi ya ya Malu-malu. Beto talaka yawu mazono na nkokila, na Apocalypse 12, kento na musiku na yisi ya makulu ya yandi, ngonda mpe mwini na yintu ya yandi, mpe kifwanusu. Oh, bima nyonso yina, Hébreux kapu ya 11 ke tuba na beto, bawu nyonso vwandaka bifwanusu mpe bivudi. Mu banza, Hébreux 12, ke tuba yandi, “Na yina me tadila ti beto kele ya kuzunga na nkonga ya nene ya bambangi, beto losa konso kizitu, mpe disumu yina ke kangaka beto kukondwa mpasi, ti beto lenda kukima mbangu na kukangaka ntima na ntwala ya beto.” Ntangu yayi, beto monaka bima yina. Na yina mazono na nkokila. . .

⁵³ Beto vutukaka awa, na kutala, to—to, nkokila ya mazusi. Beto talaka kuna, ti, dibuundu ya ntete, mutindu yawu kubandaka. Ya vwandaka nzibukulu mpe bandaka na Kilumbu ya Pentecote, kisika Mpeve-Santu kumwanganaka na zulu ya bakwikidi. Mpe beto monaka nsalulu ya bakwikidi yayi, mpe mutindu Yawu salaka na zulu ya bawu, mpe yina bawu

salaka, mpe bidimbu mpe mambu ya ngitukulu yina vwandaka landa bawu.

⁵⁴ Na manima beto talaka, na nsuka ya nsungi yina ya dibuundu, pene ya bamvula bankama tatu, bawu basisaka binzambi-nzambi mosi na kati ya bawu, ba vwandaka bokila, “malongi ya—ya ba-Nicolaïte.” Na manima beto talaka ti, ya vwandaka “bisalu,” na kubanda.

Na nsungi ya dibuundu yina landaka, ya kumaka “malongi.”

Mpe na manima kumaka “kotalisa mpasi,” na nsungi ya mpimpa.

⁵⁵ Mpe beto basikaka lweka yankaka, awa, mpe beto monaka ti ya basisaka mabuundu ya Protestant yina basikaka.

⁵⁶ Na manima beto vutukaka dyaka na manima mpe monaka mutindu tiya ve madidi ve nyonso kele awa na nsuka ya nsungi, na lweka *yayi*, mutindu yawu nyonso me kuma madidi. Kaka mutindu ya salaka na yisi ya ba-Juif, mutindu mosi ya ke na kusalaka na nsi ya Bantu ya makanda; kukuma madidi na yina ya ke na kukwendaka nzila *yayi*, kivudi, kuzimbana.

⁵⁷ Kaka mutindu ya vwandaka, na bilumbu ya Wesley, mpe Luther, mpe beto talaka yawu na mazono na nkokila. Wapi reveil ya nene beto kuzwaka, kasi, na nsungi vwandaka landa, ya bandaka na kukuma madidi. Na nsungi vwandaka landa dyaka, ya kumaka ya kulutila madidi. Mpe ntangu yayi ya kele kaka nkonga ya ba-credo mpe misiku. Ya kele kaka yina kele na yawu. Beno me mona? Mpe ya kele mutindu ya vwandaka nzila nyonso. Na yawu kuna beto me longa yawu.

⁵⁸ Ntangu yayi, beno kuwa mbote ntangu yayi, beno kuwa, samu ti ya kieleka beno kubambuka moyo. Mu ke na kubedisaka ve bantu ya Katolika, mpe mu ke na kubedisaka ve ba-Protestant, samu ti na kati ya bawu zole mpe na bawu nyonso ke kwiza Mbuma ya Nzambi, na nzila ya nsodolo. Bayina ba kubikaka na Luzingu ke mona Yawu mpe ke tambula na kati ya Yawu. Bayina lenda kumona ve, ke tambula na mpimpa. Ya me tala Nzambi. Nzambi ke salaka yawu. Yandi zengaka ndefi mpe silaka Abraham ti Yandi ke vuukisa yandi mpe Nkuna ya yandi. Ntangu yayi, kana beno kele na Nkuna ya Abraham, beno kele na Luzingu ya Seko, kaka yina, mpe beno kele bayina ke kuzwa difwa landila nsilulu. Mpe ya kele nyonso na nzila ya lemvo mpe na nzila ya nsodolo ya Nzambi.

⁵⁹ Ntangu yayi beno tala, na yayi awa. Mpe munu bantangu yankaka kele kaka . . . ya lendaka vwanda ti kana mu longaka mingi, to mu zonzaka mingi. Ya me kuma bamvula. Yayi kele lukutakanu ya ntete ya malongi yina mu me kuzwa, pene ya bamvula nana. Mpe ya kele kaka fyoti, mu banza fyoti ngolo na yawu, bantangu yankaka. Ntangu nyonso yina beno ke—beno ke . . . Beno yufula munu kyuvu nyonso beno zola; beno tula

yawu na estrade, to na chaire, mpe mu ke vwanda na kyese na kuzwa yawu.

⁶⁰ Ntangu yayi beno tala. Kasi nyonso yina mu zaba na Yawu, mu longokaka Yawu ve na muntu, to na seminere. Mu sambilaka tii mu kuzwaka luzayikisu ya yawu, mpe ya fwana kufwanakana na Ndinga ya Nzambi.

⁶¹ Na Ngwisani ya Ntama, bawu vwandaka na mitindu tatu ya kuzaba nsangu. Mutindu ya ntete bawu vwandaka zaba, ya vwandaka to ya kusonama na musiku; yankaka vwandaka profete; to kima yina vwandaka landa vwandaka Urim Thummim. Ntangu yayi mulongisi nyonso zaba yinki Urim Thummim vwandaka. Ya vwandaka nsemo yina vwanda sema na zulu ya kinkuti ya kisengo ya Aaron, yina ba vwandaka na yawu ya kulelika na tempelo. Ntangu yayi, kana profete pesaka profesu, mpe ti Nsemo semaka ve na Urim Thummim, ya vwandaka luvunu. Yina vwandaka mvutu ya Kinzambi ya Nzambi, “Ya vwandaka luvunu.” Mpe kana bawu . . . Kana muntu yina ke lotaka bandosi lota ndosi, mpe ti ya me sema ve na Urim Thummim, ya vwandaka luvunu.

⁶² Ntangu yayi, Urim Thummim me zimbana, na dyambu yina, kasi *Yayi* kele Urim Thummim ya Nzambi ntangu yayi, Biblia. Kana profete, to muntu ke lotaka, to ata nyonso yina ya kele, to mulongisi, me tula ve dibanza ya yandi na zulu ya MUTINDU ME TUBA MFUMU, mu ke kwikila yawu ve, beno me mona. Ya fwana talana kaka *Awa*, kubanda Genèse tii na Apocalypse, ya kele ve kaka na kisika mosi. Ya fwana talana na Biblia mpe kukanga Yawu ya kieleka kintwadi. Yinga, tata. Ya fwana vukana kintwadi na yankaka ya Yawu, mpe kukanga Yawu nyonso kintwadi. Kana beno sala ve, beno lendaka baka kima mosi mpe kutuba ti ya kele kombelo, mpe kulonga Katolisisme na nzila ya Biblia. Kasi ya fwana vukana ya muvimba na Genèse tii Apocalypse, samu na kusala kifwanisu ya kieleka. Ya kieleka.

⁶³ Mpe Mpeve-Santu kele Yandi Yina ke salaka kifwanisu yayi samu na beno, kana beno lenda bika kaka Yandi kusala yawu. Yandi ke twadisa beno na kati ya Nsemo nyonso. Biblia me tuba mutindu yina. Yesu tubaka ti Yandi ke sala yawu.

⁶⁴ Ntangu yayi beno tala mutindu. . . Mbala mosi dyaka, ntangu yayi, beto ke tala yina bawu salaka kuna. Na yina, na manima ya mwa ntangu fyoti, bawu kuzwaka malongi. Bawu kuzwaka lukwamusu. Bawu basikaka.

⁶⁵ Mpe na manima beto kumaka na kutala, ti na kilumbu yayi ntangu yayi, ti Biblia samunaka na ntwala ti ya ke vwanda na ntangu ntangu bantu ke kuzwa kidimbu, mpe kidimbu ya kibulu.

⁶⁶ Ntangu nyonso ti ya kele na mwa kima ke pumbuka na yinsi, muntu nyonso ke tuba, “Yina kele kidimbu ya kibulu.” Ntangu kuluntu. . . Mu vwanda me kuzwa kaka mbyekolo na dibuundu

ya Baptiste, ntangu mu kuwaka na zulu ya N.R.A. Mbote, muntu nyonso vwandaka tuba, “Yina kele kidimbu ya kibulu.” Mpe kuna nyonso bandaka, “Ya kele kidimbu ya kibulu.”

⁶⁷ Mpe ntangu yayi bawu ke tuba, “Awa ke kwiza Russie, communisme, ya kele kidimbu ya kibulu.” Kasi, ya kele luvunu. Ya kele ve kidimbu ya kibulu. Biblia ke tuba yina kele kidimbu ya kibulu. Kidimbu ya kibulu kele ve bumpani ya nene to luswaswanu na luzolo ya bantu mutindu yina. Communisme kele ve Russie; communisme kele mpeve. Ya kele nyonso... Beto—beto fwana kukikwamisa ve samu na Russie.

⁶⁸ Kubola ya beto mosi kele yina ke na kufwa beto. Communisme ke na kutambulaka kaka na kati ya mabuundu ya beto mpe nyonso yankaka, beno zaba yawu, na balukolo ya beto, na bayinzo ya beto, bisika nyonso, na yinsi ya beto. Nyonso kele kaka ya kubola. Rouge-gorge yina ke dodaka pomme kele ve yina ke bebisaka yawu; ya kele munsyobo yina ke kudyaka pomme na mukokolo. Ya kele yina ya kele, ya ke kaka kubola na kati-kati ya beto. Beto ke kwenda, ke bokila beto mosi Miklisto, mpe ke sala mambu mutindu yinza, mpe kulwata mutindu yinza, mpe kuvwanda na yinza, mpe ke bokila beto mosi. . . Yinza kele ya kubela mpe me lemba na mutindu yina. Mpe kaka yinza ve, Miklisto mingi kele, mpe. Yinga.

⁶⁹ Mu ke tubaka bambala mingi, “Nzambi sadisa kilumbu ntangu bantu ke vwanda yina bawu fwana vwanda. Kana mu vwandaka telemina Yandi, mu zolaka tuba ti mu vwandaka telemina Yandi, mu ke telemina Yandi na mambu nyonso mu lendaka vwanda.” Kasi mu kele samu na Yandi, mpe mu zola Yandi, mpe mu ke kwikila Yandi. Mpe—mpe luzingu ya munu kele na maboko ya Yandi, samu na kusala nyonso yina Yandi zola, samu ti mu ke kwikila ti Buklisto kele Kieleka. Ya kele kieleka. Mu ke kwikila ti ya kele Kieleka.

⁷⁰ Na kuzyetaka na yinza, mpe na kutalaka yawu na ba-isme ya mutindu na mutindu, mpe nyonso yina, bamfumu ya bawu nyonso me kufwa mpe kele ya kulala na ntoni, mpe bawu kele na theologie. Ya kele kaka ntama mutindu dibuundu ya Muklisto ke kwendaka na yawu, ata mutindu yina.

⁷¹ “Kasi bayina zaba Nzambi ya bawu ke sala mambu ya nene.” Mpe Ngolo ya mvumbukulu Yesu Klisto ke zinga na kati ya muntu. Ya kele kieleka. Yandi kele ya kufwa ve; Yandi me vumbuka na lufwa. “Mu ke vwanda na beno, mpe na kati ya beno, mpe bima yina Mu ke sala beno mpe ke sala.” Yinga, tata.

⁷² Mpe yinza ke tala mpe ke tuba, “Bufanatiki.” Beno me mona kisika beto bakaka yawu mazono na nkokila, na lusalusu ya Nzambi.

⁷³ Ntangu yayi, beto ke tala ti kima ya ntete yina basikaka ntete ve na kusala kifwanusu ya kibulu, na mutindu nyonso, to... *Kibulu* zola kutuba “ngolo.” Beto talaka bidimbu nyonso

mpe bima nyonso, mazono na nkokila, samu na kusiamisa ti kibulu vwandaka ngolo. Mpe yawu basikaka ve na Russie. Yawu basikaka na Rome. Ya kele kieleka. Yawu me katuka na Rome.

⁷⁴ Mpe yawu vwandaka ve—yawu vwandaka ve nkonga ya bantu. Yawu vwandaka ve organisation ya politiki. Yawu vwandaka yinzo ya bisambu. Yawu vwandaka dibuundu yina vwandaka “ya kuvwanda na zulu ya myongo sambwadi,” na muntu mosi yina vwandaka na ngolo ya kuyala yinza ya muvimba, na kati kuna. Ya kele kaka kieleka. Mpe beto talaka ti ya vwandaka kento mosi, mpe beto lengaka kaka yandi na mutindu ya mbote. Na kubakaka ve lutendulu ya munu mosi; mu tangaka kaka Biblia. Ti, ya kele ve na kisika yankaka na yinza, ata mbanza yankaka na yinza, ke yalaka na zulu ya ntoto nyonso. Na konso yinsi, nsinga yina ya kisengo ya Romanisme ke na kumwangana mutindu na misapi kumi ya makulu ya vision ya Daniel, mpe beto talaka ti ya vwandaka Mbanza ya Vatican.

⁷⁵ Pene ya bantu kumi na zole ya Katolika vwandaka ya kuvwanda awa mazono na nkokila. Bawu vwandaka swi mpe vwanda kuwa. Bawu kele bantu ya kusungama. Bawu kele na nzala.

⁷⁶ Ntangu yayi, beno lenda swana ve na nganga-Nzambi. Yandi lenda swana ve, samu ti, nganga-Nzambi, “Kana dibuundu tuba kima ya mutindu yankaka na Biblia yayi, dibuundu kele kieleka.” Samu na munu, Biblia kele kieleka mpe dibuundu kele na luvunu. Beno me mona? Beno lenda swana ve na bawu. Bawu, beno kele. . . Ya kele ve na mutindu ya kuswana. Ya kele ve na mutindu ya kuswana to kusolola. Samu ti, bawu ke kwikila, “Yina dibuundu ke tuba, yawu yina! Ya kele yawu, yina dibuundu ke tuba, ata nyonso yina Biblia ke tuba. Ya kele yina dibuundu ke tuba!” Bawu ke kwikila dibuundu. Beto ke kwikila Biblia.

⁷⁷ Ntangu yayi beto ke tala ti ba bokilaka yandi. . . Dibundu vwandaka kento. Mpe ba bokilaka yandi na nkumbu ya yimbi, na mpova ya yimbi ya “NDUMBA,” mpe kuna yandi vwandaka “MAMA YA BAKENTO YA KINDUMBA.” Mpe beto ke tala ti dibuundu ya Katolika vwandaka dibuundu mama ya ntete. Yandi kele ya kieleka yina yandi tubaka ti yandi vwandaka. Yandi kele dibuundu ya ntete yina salaka organisationya ntete. Ntangu Nzambi bongisaka lukwikilu ntete, ya vwandaka dibuundu ya Katolika. Organisation ya ntete yina ba bongisaka ntete na yinza, ya lukwikilu ya Miklisto, dibuundu ya Katolika. Ntangu yayi. . .

⁷⁸ Mpe kuna, na nsuka, yandi vwandaka “MAMA YA BAKENTO YA KINDUMBA.” Yandi butaka mabuundu, na manima ya yandi, samu ti bawu zolaka vwanda ve bana ya babakala, bawu zolaka vwanda bana ya bakento, mpe beto talaka ti dibuundu ya ba-Protestant kele mbuma ya dibuundu

ya Katolika. Na kusosaka Masonuku, mpe na kutalaka na buku ya beno ya masolo, beto talaka ti dibuundu ya ba-Protestant kele mbuma. Mpe ba-Protestant lenda boka ve na Katolika, samu ti, nyonso zole, ba ke tuba ti bawu kele “BAKENTO ya kindumba” mpe “KENTO ya kindumba.” Ya kele yimbi, kasi ya kele MUTINDU ME TUBA MFUMU. Ya kele kieleka.

⁷⁹ Beno tala mbote, na yina yandi tubaka, “Ti beto,” na Etats-Unis, bawu ke tuba, “ti beto sala kifwanisu ya kibulu.” Kana kibulu vwandaka ngolo, mpe ngolo vwandaka organisation; ya kele ve kubaka dibanza mosi ntangu yayi. Ya kele Ndinga ya Nzambi. Organisation ya dibuundu ya Katolika kubongisaka bawu mosi kintwadi mpe salaka de- . . . kuwisana. Mpe bawu vwandaka, yina bawu ke bokilaka, “batata ya ntete” kintwadi, mpe bongisaka dibuundu ya Katolika, mpe salaka rite, mpe yina bawu kwikilaka mpe yina bawu ke longa, lukwikilu ya ntoto nyonso. Mpe bawu vwandaka kwika yawu na bantu, na nzila ya kitumbu.

⁸⁰ Mpe kuna ntangu Martin Luther kubasikaka, na kumonaka Mpeve ya Nzambi kutwadisa yandi na kubasika, na kisika ya kubika bantu kuvwanda na kimpwanza, yandi bongisaka dibuundu, kifwanisu ya kufwanana na kibulu, ngolo ya politiki mutindu yawu. Na kisika ya kubika bantu kutambula mutindu Nzambi pesaka Nsemo, bawu bongisaka na yisi ya musiku mosi, mpe bawu zolaka vwanda na musiku yina.

⁸¹ Nzambi basikaka mbala mosi na kukota na dibuundu ya ba-Methodiste. Ba-Methodiste kuzwaka reveil yina kombolaka yinza; Mpeve-Santu na bawu, na kulongaka kusantisama. Mpe kima ya ntete beno zaba, ntangu bawu salaka yawu, na manima bawu salaka organisation na dibuundu, salaka kifwanisu na kibulu, ya kele kieleka, ngolo ya politiki, ngolo ya organisation, samu na kukanga bantu ya Nzambi na credo; na kisika ya kuvwanda na kimpwanza ya kusambila mpe kutambula na nsemo mutindu nsemo basikaka na nzila ya bawu.

⁸² Ba vutulaka bawu na manima, na nsungi yina. Yina vwandaka nsemo ya mbote samu na kuna. Ya vwandaka nsemo samu—samu na dibuundu ya Pergame.

⁸³ Kasi wapi mutindu samu na dibuundu ya Philadelphie? Ya kele nsemo yankaka. Kasi, beno me mona, ata mutindu nyonso yina bawu salaka organisation, Nzambi mbala mosi basikaka na nsungi ya dibuundu *yayi*, na mutindu nyonso, basisaka muntu, na nkumbu ya John Wesley. Luther zolaka landa yawu ve, samu ti yandi kukwikilaka yawu ve. Yandi bongisaka yawu yimeni *awa*.

⁸⁴ Na manima John Wesley kubongisaka yawu mingi, mpe kumaka na kisika mosi. Ya vwandaka ntangu samu na nsungi ya dibuundu *yayi* na kukota. Nzambi fidisaka nkonga ya ba-Pentecotiste; na kubasika awa na mbotika ya Mpeve-Santu. Oh, ba-Methodiste tubaka, “Uh-oh. Huh! Beto lenda kwenda ve na

Yawu. Huh-uh! Beto ke kwikila ve na kima ya mutindu yina. Oh, ve.” Samu na yinki? *Yayi kele* nsemo yina bawu vwandaka tambula, *awa; awa kele* nsemo samu na lweka *awa* ntangu yayi.

⁸⁵ Beto ke na kukwenda na kisika ya kulala ya mwini. Beno ke bambuka moyo na yina profete tubaka? “Ya ke vwanda na kilumbu yina matuti ke vwanda, to mpimpa to mwini ke vwanda ve, kasi na mpimpa ya ke vwanda na Nsemo.” Nsemo yina vwandaka lezima na yinsi ya esete na ba-Juif, na esete (Ba-Juif kele bantu ya esete), Ya ke na kulezimaka na Bantu ya makanda; Nsemo mosi, Mpeve-Santu mosi, na bilumbu ya nsuka na lweka awa, mbotika mosi ya Mpeve. Beto me tala bansungi nyonso yayi tii awa, kisika ya kele ntangu to ya Nsemo to ya mpimpa, kasi ya matuti, kilumbu ya dibungi; kasi kaka *awa*, mutindu Nsemo lezimaka kaka mutindu mosi ya salaka kuna.

⁸⁶ Ya kele samu na yina, “Yandi kele mutindu ditadi ya jaspe mpe ya sardoine; Alfa, Omega, Mbandukulu mpe Nsuka; Yandi Yina Vwandaka, Yina Kele, mpe Ke Kwiza; Nsimbulu mpe Nkuna ya David; Mbwetete ya Suka.” Yawu yina. [Kisika ya mpamba na bande—Mu.] Mu banza ti beno ke mona yawu.

⁸⁷ Mpe, beno bambuka moyo, ti beto talaka, kukondwa kyeta mosi ve, ti kidimbu ya kibulu kele kidimbu ya kumanga lukwikilu, yina kele, bamambele ya dibuundu yina ke na kukangamaka na dibuundu ya bawu na kisika ya kutambula na Nsemo. Bawu ke manga Nsemo, mpe ya kele na kima ve yina me bikana kasi mpimpa. Ya kele kieleka, nyonso zole Katolika mpe Protestant. Ya kele “na kibulu, mpe kento ya kindumba,” mpe yandi kele “kento ya kindumba” bana ya yandi ya bakento. Mpe bana ya bakento yayi ya kindumba, ntangu bawu butukaka, bawu vwandaka mwense na Nsemo ya kilumbu yina, mpe bawu bongisaka mpe vutulaka bantu awa, mbala mosi awa, na kusalaka bawu mutindu mosi ya kima mosi yina Rome vwandaka na mbandukulu. Biblia me tuba mutindu yina. “Kibulu; mpe kifwanisu ya kibulu; kisono ya nkumbu ya yandi,” mpe nyonso yina.

⁸⁸ Mutindu beto talaka yawu nyonso, mazono na nkokila, mpe na Biblia pwelele. . . ve dibanza ya muntu. Kasi Biblia lakisaka yawu, ti kibulu ya bayintu sambwadi yina, ya bampoka kumi [Kisika ya mpamba na bande—Mu.] katukaka Rome, vwandaka kuna na Rome, mpe vwandaka “yandi yina vwandaka, yina kele ve; mpe yina kele, mpe yina kele ve,” pape mosi na manima yankaka, pape mosi na manima yankaka, mpe ke kota na zimhani. Mpe beto talaka ti kento mosi yina ya ntama butaka mwa bana ya bakento. Bawu vwandaka bamwense na mbandukulu, tambulaka na Nsemo yina bawu vwandaka na yawu. Mpe kuna bawu bandaka na kusala mutindu bakento ya kindumba, mpe bawu vutukaka mbala mosi na kusalaka kima mutindu mosi yina mama ya bawu salaka. Ya kieleka. Ya kieleka.

⁸⁹ Beno bika mu tuba na beno kima mosi, bakento. Beno kuwa. Beno lendaka tula kivuvu mingi ve na munu ntangu yayi, ntangu mu ke tubila bima yayi. Mpe ya kele ve samu na kotalisa beno mpasi; ya kele samu na kusadisa beno. Kasi ntangu beno ke mona bantu, mabuundu bubu yayi, kupesa muswa na bakento ya bawu. . . Ntangu yayi, mu—mu ke kuma na babakala, mpe. Kasi ke pesa muswa na bakento ya bawu na kusala mutindu ba ke na sala bubu yayi, mpe bawu ke tuba Buklisto! Mu ke semba beno ve bakento; mu ke sala yawu, na manima ya nkokila yayi. Kasi, beno tala, mu—mu ke semba beno ve bakento ntangu yayi. Kasi, mpangi ya munu ya kento, mingi ya milongisi ya seminere yayi awa, to milongisi ya maziama, to nyonso yina beno ke bokilaka yawu, bayina ke katukaka kisika mosi awa, ke na kubikaka kaka beno kutambula na mabanza yina. Biblia ke tuba ti bawu vwandaka ya kufwa meso, vwandaka twadisa bantu ya kufwa meso. Ya kele kieleka.

⁹⁰ Ntangu yayi, mpe Yesu, na kumonaka yayi, mpe na kuzabaka ti bayankaka ya mabuundu ya ba-Protestant yina ke belama mbala mosi na mwelo ya Nsemu, mpe ke baluka. Yesu, na Matthieu 24:24, me tuba ti ya ke vwanda mutindu *yina*, mbeni ya Klisto ke vwanda ya kufwanakana *mingi* na Yina ya kieleka, tii ya ke vuna Musoolami, kana ya lendaka salama.

⁹¹ Ntangu yayi, beno me mona, Romanisme, Katolisisme, oh, ya kele kubula mosi na yintu ya beno ba-Protestant. Kasi, muntu yina kele na mwa ndambu ya lemvo samu na yandi, mwa . . . zaba fyoti na zulu ya Biblia, yandi ke tina mpe ke kwenda. Ya kele kieleka. Ya kele mvwandulu ya yandi kele ndombe; yandi zaba ti ya kele na kima mosi ve na yawu, bima nyonso yina bawu ke longaka. Ya kele na ata Masonuku na yawu; bantangu yankaka, bawu ke baka mwa fyoti.

⁹² Luvunu ya kulutila nene me tubamaka ntete ve, vwandaka na Kieleka mingi na kati ya yawu. Ya kele kieleka. Mpe yina ya ntete, Satana zonzaka na Eve, yandi tubaka Kieleka mingi. Kasi yandi vwandaka na kima mosi, na yisi ya yawu, yandi vwandaka na luvunu yina bedisaka kento, mpe bebisaka nsungi nyonso, luvangu ya muvimba. Ya kele kieleka.

⁹³ Beno fwana sala keba na yawu. Ya fwana pesa Kieleka *awa* mpe Kieleka *awa*, Kieleka *awa* mpe Kieleka *kuna*. Konso kitini ya yawu, Kieleka; ke tandama mutindu mosi, nzila nyonso.

⁹⁴ Mpe kuna wapi mutindu bantu lenda mona dibuundu ya ntama na manima kuna yina vwandaka ya kulezima na dikulu ya mwinda ya mwinda, mpe kuna kumona *awa* kima mosi kusalama yina salamaka ntama kuna, mpe Ndinga ya Nzambi ke tuba ti ya ke vwanda “Yesu Klisto mutindu mosi mazono, bubu yayi mpe ntangu nyonso.” Mpe ke manga yawu? Ya ke lakisa ti ba me losa Nsemu, mpe ke tambula na kati ya mpimpa; ya kele kaka kima me bikana.

⁹⁵ Ya kele kieleka, mpangi ya munu. Mu ke tuba yawu ve samu na kuvwanda ya mayela. Nzambi zaba yawu. Yandi zaba ntima ya munu. Mu kele na ministele, mpe mingi na ntwala ya munu. Mpe mu zaba ti kilumbu mosi, na Kiti ya Lufundusu, mu ke pesa mvutu samu na bima yayi. Ya kele kaka kieleka. Kana mu kele mufundi, mulongisi ya luvunu, kuna Nzambi ke bedisa munu. Ya kele kieleka. Kasi kana mu zaba Kieleka ya bima yayi, mpe ti mu tuba na beno ve, Yandi ke bedisa munu na ntangu yina, ya kieleka.

⁹⁶ Yandi tubaka na mukengi, “Sala keba! Kana nge kondwa kukebisa, kuna Mu ke—Mu ke lomba yawu na diboko ya nge. Kasi kana nge kebisa, mpe ti bawu landila na kukwenda na ntwala, bawu ke kufwa na disumu ya bawu, kasi mu ke lomba yawu ve na diboko ya nge. Nge ke vwanda na kimpwanza.”

⁹⁷ Na yawu beto zola sala keba ti beto zaba yina kele Kieleka, landila Biblia. Mpe mutindu nsungi yina bandaka, mpe yina bawu salaka, mpe bubu yayi kumona dibuundu ya ba-Protestant ya kieleka kuna.

⁹⁸ Beno tala awa. Ya vwanda vwandaka, na bilumbi mingi ya ntama, mpe beno bantu ya busantu, ya vwandaka yimbi samu na beno bakento na kuzenga nsuki ya beno. Yinki me kuma mbote na yawu? na ntangu Biblia ke tuba ti . . . kana kento zenga bansuki ya yandi, bakala ya yandi kele na muswa ya kufwa makwela na yandi. Ya kele malongi ya nkunzu, kasi ya kele Biblia.

⁹⁹ Mpe beno bakento, beno ke basika awa mpe ke zenga matiti na lupangu ya beno, mpe ya kulwata bilele ya babakala. Mpe Biblia ke tuba, Nzambi ya Ngolo nyonso ke tuba, “Kento yina ke lwata kinkuti yina kele ya bakala, ya kele busafu, mvindu na meso ya Nzambi.” Mpe beno ke salaka yawu.

¹⁰⁰ Mpe beno ke kunwa makaya, beno ke kwenda na bisika ya kubina mpe na sinema, mpe dyaka kele ya dibuundu. Beno ke lakisa ti beno me kuzwa mutindu mosi ya kima; beno kele ya kutula kidimbu ve na Mazulu, Mpeve-Santu. Na manima ya mwa ntangu fyoti beto ke kota na yawu, mpe kulakisa beno ya kuswaswana na yina. Ntangu yayi, yina kele kaka kima mosi ya fyoti.

¹⁰¹ Mpe beno babakala, beno ke kwenda na dibuundu, ke kulumuka babala-bala na cigare na yinwa ya beno, mutindu ngombe ya Texas, ba me zenga bampoka. Mpe kuzwa . . . Mu ke na kutuba yawu ve samu na kusakana. Mu ke kwikilaka ve na kusakana na chaire. Mu ke na kutubaka ya kele Kieleka. Beno ke kulumuka bala-bala, mpe ke vwanda na bisika, mpe ke vuna, mpe ke yiba, mpe ke sala mayuya mosi na yankaka, mpe badiacre na kimvuka ya dibuundu.

¹⁰² Ke kwenda na mabuundu mpe ke bula bansaka ya mbongo ya ntama, ya kele kima ve na yinza kasi loto, kima ya yisi mpe ya

yimbi. Ya kele kieleka. Mpe beno ke sala yawu, mpe na manima beno boka na yina me tala pari. Beno kele kaka yimbi, na kati ya mabuundu ya beno, beno ba-Methodiste, ba-Baptiste, mpe ba-Pentecotiste, nyonso yina beno kele ke salaka yawu. Ya kele kieleka. Mpe beno zaba ti ya kele kieleka. Kasi yinki ya kele? Beno ke lemba kaka mutindu mama ya beno na ntangu ya ntama kuna. Ya kieleka kaka kima mosi, mpe nzungu lenda zonza ve na kikalungu ndombe. Mpe ya kele na mpeve yina ya bima.

¹⁰³ Kasi mu kele na dyambu ve na bantu ya Katolika. Mu kele na dyambu ve na ba-Methodiste, to na ba-Baptiste, to na ba-Presbyterien. Nzambi kele na bantu, Bankuna ya Abraham, kuna. Ya kele dyambu na bantu ve. Ya kele samu na mabuundu ya bawu, ke sala organisation bawu mosi kuna, mpe bawu ke sambila dibuundu na kisika ya Nzambi. Oh, beno ba-Protestant zola kukwikila yawu ve, kasi beno ke salaka yawu, na mutindu nyonso. Mu ke tuba, “Beno kele Muklisto?”

¹⁰⁴ Mbote, awa ntama mingi ve, Mpangi Bosworth yufulaka mwana mosi ya kento, yandi tubaka, “Nge kele Muklisto?”

¹⁰⁵ Yandi tubaka, “Muklisto? Mu ke tuba na nge, mu ke yokaka buzi konso mpimpa!”

¹⁰⁶ Mbote, ntangu yayi beno ba-Protestant ke banza ti ya kele kima mosi? Beno kele Muklisto? “Mu ke tuba na nge, mu kele Methodiste,” to “Baptiste.” Mbote, yina zola kutuba kima ve kasi beno me basika na kilumbu ya lemvo, samu na beno mosi, samu na munu; ya kele kieleka, kana ya kele nyonso yina kaka beno kele, kaka Methodiste to Baptiste. Kana beno kele ve Muklisto na kati ya dibuundu ya Methodiste, to ya Baptiste, to na dibuundu ya Katolika, beno kele ya kuzimbana. Ya kele kieleka. Na yawu beno tala ya kieleka kidimbu ya beno.

¹⁰⁷ Bidimbu nyonso zole kele ya kimpeve. Ntangu yayi mu ke siamisa beno yawu na nzila ya Biblia. Bidimbu nyonso zole kele bidimbu ya kimpeve.

¹⁰⁸ Bantu mingi banzaka ti, “Bawu ke kwenda kuna mpe kusala tatouage na mbunzu, mpe kusala tatouage na diboko.” Beto talaka, mazono na nkokila, ti ya vwandaka luvunu. Yinga, tata. Ya kele luvunu. Ya kele kidimbu ya kimpeve. Ya kele—ya kele kaka ya kubumbama mingi. Mpe, beno tala, bambala mingi. . .

¹⁰⁹ Ntangu yayi mu zaba ti yayi lendaka sala mapapu mingi kuyidama, mpe ya—ya—ya ke monana ngolo. Kasi ya—ya ke sungika kana beto ke kaka. . . mpe kupesa Nzambi kaka mwa siansi. Mu—mu ke zola ve kutuba mambu ya ngolo mingi, kasi mu—mu ke na kumeka na kuvwandisa dyambu, na ntima ya munu nyonso.

¹¹⁰ Ntangu Yesu Klisto monaka dibuundu ya ba-Protestant kubasika na dibuundu ya Katolika yina kuna, kubasika mpe kuvutuka mbala mosi, mpe na kuvutukaka dyaka kaka mutindu

bawu salaka, Yandi tubaka, “Mpeve ke vwanda ya kubelama mingi, tii ya ke vuna Musolami ya kieleka . . .”

¹¹¹ Beno me bakula, bankundi ya Miklisto, ti mbeni ya Klisto, kele kidimbu ya kibulu? Mbeni ya Klisto, muntu nyonso zaba ti mbeni ya Klisto kuna, ya kele kidimbu ya yandi, ya kele . . . ya ngolo ya yandi. Mpe, beno me mona, ya kele kibulu, kele ngolo. Ya kele ngolo ya dibuundu ya Katolika. Ya kele na ngolo ya dibuundu ya ba-Méthodiste.

¹¹² Mu kwendaka, awa ntama mingi ve, na bakala mosi ya mbote mingi. Kana mu me zimbana ve, yandi kele ya kuvwanda awa na dibuundu na nkokila yayi. Mpe ntwenya Edith Wright mpe bayankaka kwizaka awa na lukutakanu, ya kele ve bakilometele makumi tatu na zole na kisika yayi. Mpe, beto, bantu . . . Mu vwanda longa kaka Nsangu ya mbote ya mpulusu. Beto zolaka mata na zulu ya matoma samu na kukuma na kisika yina. Mpe na nkokila yina, pasteur kubokilaka munu mbala mosi, yandi tubaka, “Lemvokila munu na kutubila nge, Révérend Branham. Kasi bawu me tuba na munu ti bawu kele na mwa bantu ya kubela yina me kwiza kuna, mpe ntwadisi ya beto ya kizunga kwizaka mpe tubaka, ‘Ata kubeluka ya Kinzambi na dibuundu ya ba-Methodiste.’ Na yawu nge fwana kwenda na estrade, kubendana nge mosi, mpe kubika dibuundu.” Ya kele kieleka.

¹¹³ Samu na yinki? Ngolo ya dibuundu ya ba-Methodiste. Yina kele ngolo ya kibulu. Dibundu ya ba-Baptiste mutindu mosi; ba-Campbell, mpe ba-Lutherien, mpe bayankaka nyonso ya bawu, mpe bantu ya Pentecote, kele mpe yimbi. Ya kele kieleka. Mu vwandaka na bantu ya Pentecote . . . Mpe ba-Assemblée ya Nzambi me kota na kimvuka ya mabuundu, yina kele . . . Bawu me vukana kaka bawu mosi awa, mpe na “mama” ya ntama ya kindumba. Na yawu konso organisation ya dibuundu me katuka na Rome. Beno tala mama ya yawu. Mpe mu kele ve Santu ya Kilumbu ya Nsuka, to ya Mvula ya Nsuka, to nyonso yina beno ke bokilaka yawu. Mu zola ve . . . Mu kele ve mosi ya yina.

¹¹⁴ Kasi mu zola kutuba yayi, ti babakala mpe bakento zolaka vwanda na kimpwanza na Klisto Yesu, na kutambula na Nsemo. Mpe konso dibuundu zolaka vwanda kima mutindu mosi. Ya kele kieleka.

¹¹⁵ Ntangu yayi, beno tala yayi, mutindu Biblia . . . Beno bakula yawu. Organisation yina, beno bambuka moyo, ya kele kisika ya kele, kaka kuna. Mpe beto monaka, ti ntangu dibuundu ya Katolika kubandaka na manima kuna, bawu basikaka na mbotika ya luvunu, mwa kumwangisa ya maza na kisika ya kubotika. Ya kele na Masonuku mosi ve na kati ya Biblia samu na yawu. Mpe yina kaka ve, kasi Mpeve-Santu, mpe mbotika na maza, mpe mitindu, mpe bisalu, mpe nyonso yankaka, ya kele kaka bilanda-landa ya kima ya kieleka. Mpe ya kele ve na mulongi na yinsi, yina lenda lakisa munu kisika mosi ya

kusalamaka ntete na dibuundu ya ntete. Ya kele kieleka. Ya kele ve na kati ya Biblia. Kasi bawu basikaka na yawu, mpe beto ke fukama kaka na yawu. Beno me mona kisika beto ke na kuvutuka kaka?

¹¹⁶ Mpe bubu yayi beno ke kukiyufula samu na yinki beto kele ve na reveil. Ya kele yina ya kele, mpangi. Yina beto kele na yawu nsatu bubu yayi kele reveil ya mbote, ya ntama, ya Santu Paul, mpe Mpeve-Santu ya Biblia na kuvutuka dyaka na yinsi. Ya kele yina beto kele na yawu nsatu. Ntangu yayi . . .

¹¹⁷ Mpe ba me baka “kidimbu ya kibulu,” to “kisono ya nkumbu ya yandi,” yina ba salaka kifwanisu. Kifwanisu vwandaka organisation kaka mutindu dibuundu ya Katolika. Bawu salaka organisation na yawu mpe salaka kifwanisu ya dibuundu ya Katolika. Dibuundu ya ba-Methodiste kele kifwanisu ya yawu; dibuundu ya ba-Baptiste, dibuundu ya ba-Presbyterien, dibuundu ya ba-Pentecotiste, dibuundu ya Busantu, ba-Pèlerin ya Sainteté, Bampangi Ya Kuvukana? Mosi na mosi yina me sala organisation, me baka dibanza kuna. Ya vwandaka ata fyoti ve na kati ya Biblia ya Nzambi. Ya kele kieleka. Ba-organisation; kubongisa!

¹¹⁸ Nzambi kele ntwadisi. Beno fyongonina yawu ntama mutindu beno zola. Beno tala Israel, kubasika na Egypte.

¹¹⁹ Mpe bantu yina nyonso ya Moab vwandaka kuna, na misiku, vwandaka pesa minkayulu; ba-autel sambwadi, sambwadi ya ba- . . . mameme sambwadi, vwandaka zonzila nk wizulu ya Klisto; bangombe sambwadi, minkayulu ya kutsyema. Kaka kuna, profete ya yandi ya nene ya kutelama kuna, Balaam, samu na kusinga Israël. Mpe kuna vwandaka Israel. . . Kuna vwandaka Moab, yinsi ya nene. Ya vwandaka na ba-Amoreen mpe nyonso, yisi ya nene, ya kubongisa mutindu yinsi.

¹²⁰ Mpe Israel vwandaka ya kumwangana kuna na bilanga na bikunku ya batenta. Bawu vwandaka “bizyeti mpe banzenza, vwandaka sosa Mbanza yina ke kwiza,” yina kele kieleka tabernacle yina ke yambaka bantu nyonso. Mpe yinki bawu salaka? Bawu vwandaka na bidimbu mpe mambu ya ngitukulu yina vwandaka landa bawu. Bayayi ve; mpe bawu vwandaka na musoki na bawu yina. Bawu vwandaka bampeve.

¹²¹ Nzambi ke bakaka muntu ya Yandi, kasi ata mbala mosi ve mpeve ya yandi. Yandi bakaka Élie, mpe mpeve ya yandi kwizaka na zulu ya Élisée, bamvula bankama mingi na ntwala, ya kwizaka na zulu ya Jean Baptiste, tubaka dyaka na ntwala samu na kilumbu ya nsuka.

¹²² Dyabulu ke bakaka nkadulu ya yandi, kasi ata mbala mosi ve mpeve ya yandi. Mulongisi mosi yina ya musambidi yina fundisaka Yesu Klisto samu na bimangu mpe bidimbu mpe mambu ya Yandi ya ngitukulu, mpe yina vwandaka ya kuswaswana na Yandi na Masonuku, vwandaka mpamba mingi

na kwiza mpe kutubila Yandi na yawu. Mpeve mosi yina ke zinga tii na kati ya milongisi ya dibuundu bubu yayi...?... ya kukubika na Nzambi na kukota na kitumbu yina. Ya kele yina Biblia ke tuba. “Bantu ya ntama, yina zabanaka na ntwala na kitumbu yayi, na kubalula lemvo ya Mfumu ya beto na kukondwa buzitu.” Ya kele kaka kieleka. Na Jude, na nzila ya 3—ya 3 ya—ya Jude, beno lenda tala yawu. Ya kele kieleka.

¹²³ Beno tala bima nyonso yina ke lakisa kuna, ti ya kele na kidimbu ya kibulu. Ya kele kisika ya kele. Na yawu ntangu beno ke kwenda mbangu bisika nyonso awa na kutubaka, “Mbote, mu ke lakisa ntangu kidimbu ya kibulu ke kwiza,” beno sala keba ti beno me kuzwa yawu ntete ve. Mpe bayina kele na yawu, ke vwanda ya kusemba na tiya mpe soufre, ke tsyamunaka na mbungu ya nganzi ya Nzambi, samu na kukwamisama ntangu mpe mpimpa, kukondwa nsuka mpe kukondwa nsuka. Ya kele kima ya kusakana ve. Ntangu yayi wapi kisika kele nzila ya beno ya kukimina?

¹²⁴ Ya ke vwanda na ntangu, yina ke na kwiza na ntangu kaka yayi. Beno tala, mpe na kati ya organisation yina ke na kusala... Ntangu yayi beno bika mu pesa beno mwa kima mosi awa. Na organisation yina ke na kusalaka mutindu yina, ya ke na kwiza ntangu yina beno fwana vwanda mosi ya organisation yina to beno lenda sumba ve to kuteka ve; to kuzwa kidimbu yina ya kumanga lukwikilu, kidimbu ya dibuundu. Beno fwana vwanda mosi ya organisation mosi to beno lenda sumba ve to kuteka ve.

¹²⁵ Mpe, beno kuwa, samu na beno bantu yina zaba yina kele Kieleka. Mu ke na kutubaka ve ti beno basika na dibuundu ya beno. Mu ke na kutubaka ve kima mosi samu na kutelemina ya beno... samu na beno to samu na bamambeke ya beno. Mu ke na kutubila samu na ba-quartier general, ntama kuna ntangu ba bongisaka kima yayi, mpe salaka yawu, “Beto ke sala *yayi*. Beto ke sala *yina*.” Mpe ba tulaka misiku yina ya kisengo. Mpe Nzambi mwangisaka yawu na bitini-bitini, mpe basisaka Dibuundu ya Yandi na nganda ya yawu; ke salaka yawu ntangu nyonso.

¹²⁶ Beno tala na nzyetolo ya bana ya Israël. Bawu vwandaka sala tiya. Bawu vwandaka vwanda mpimpa nyonso. Dikunzi ya Tiya vwandaka ya kulelika na zulu ya bawu. Mpe mu ke kipe ve wapi ntangu ya kilumbu to ya mpimpa ya vwandaka ntangu Dikunzi ya Tiya yina vwandaka kwenda, bampungu vwandaka bula mpe Israel vwandaka katula kan mpe vwandaka kwenda. Kana ya vwandaka na kati-kati ya mpimpa, na ngunga ya zole na manima ya midi, ntangu nyonso yina ya vwandaka, bawu vwandaka katula kan mpe vwandaka landa Dikunzi ya Tiya. Ya kele kieleka? Bawu vwandaka landa Tiya.

¹²⁷ Mbote, ntangu Martin Luther kumonaka Tiya ya Nzambi kubasika, Martin Luther kubasikaka, landaka Tiya na

kubasikaka na Katolisisme. Kasi yandi tungaka na yisi kuna mpe bongisaka dibuundu ya yandi, mpe yandi lendaka ve na kutambula.

¹²⁸ Tiya basikaka mbala mosi, mpe Wesley kumonaka Yawu, mpe kuna yandi landaka Yawu. Ya kele kieleka. Tiya ya Nzambi bikaka Luther kuvwanda. Mpe, kima ya ntete beno zaba, Wesley tungaka na yisi ya Yawu, dibuundu ya ba-Methodiste ya Wesley.

¹²⁹ Mpe na manima kwizaka Alexander Campbell, John Smith na ba-Baptiste, mpe nyonso yankaka mutindu yina, mpe Moody, mpe nyonso yina. Mpe, kima ya ntete beno zaba, bawu bandaka na kukuma ya misiku, mpe kilo, madidi, ntangu baprofete ya ntama kufwaka, mpe nyonso yina. Nkonga yayi ya malu-malu kwizaka na kima ve kasi malongi ya seminere, mpe kuna, kima ya ntete beno zaba, maboko kotaka na pate mpe mwangisaka yawu.

¹³⁰ Mpe Mpeve-Santu basikaka, mpe ba-Pentecotiste monaka Yawu mpe kuna bawu basikaka; kieleka, kwendaka mbala mosi, ntama na ba-Methodiste mpe ba-Baptiste, mpe nyonso yina. Ntangu yayi kima ya yimbi na yawu, kasi samu na kulungisa Ndinga ya Nzambi, bantu ya Pentecote salaka organisation, mpe kaka madidi mpe ya misiku mutindu bayankaka ya bawu. Kasi, beno tala, ya ke vwanda dyaka ve na nsungi ya dibuundu yankaka. Nsungi ya nsuka kele Nsungi ya Dibuundu ya Laodicée, yina kele tiya to madidi ve. Ya kele kaka nsambulu ya kulunga, ntangu musiki ke bula, kubina na kudumukaka mpe kukulumukaka kulwale, mpe na manima kuvwanda, kukwenda na yinzo mpe kuzonza na yina me tala mfinangani.

¹³¹ Yina beto ke na yawu nsatu bubu yayi kele Mpeve-Santu ya mutindu ya ntama, yina Nzambi ke pela, reveil yina ke sala ti beno lala na kizizi ya beno mpe kudila, kilumbu mpe mpimpa, mpe kudila mpe kunyonga, mpe kulandila, samu na masumu ya yinza. Beto ke kota na yawu. Ya kele kieleka.

¹³² Kasi bawu yina. Ya kele kaka kisika yina beto kele, tiya ve madidi ve. Nzambi tubaka, “Ya ke sala kaka Munu kubela na kifundu ya Munu! Mu ke basisa kaka beno na yinwa ya Munu.” Ya kele dibuundu, dibuundu ya ba-Protestant, yina ba me losa. Dibuundu ya ba-Protestant me losama; kubanda na Pentecote tii Luther, konso kitini ya Yawu. Ndinga ya Nzambi me tuba mutindu yina.

¹³³ Kasi na mosi na mosi ya mabuundu yina, Yandi me baka Musoolami. Yandi me basisa Nkuna na mosi na mosi, na ba-Methodiste, na ba-Baptiste, na ba-Presbyterien, na ba-Luthérien, nzila nyonso kuna, na Katolika, mpe na nyonso. Yandi me basisa ndambu, me basisa bantu mosi.

¹³⁴ Awa ntama mingi ve, ntwenya mosi ya mama vwandaka kaka ya kulala awa na Louisville, muntu ya Katolika, yina

vwanda kufwa. Mu kwendaka kuna. Mpe nganga-Nzambi tubaka, “Buzoba, kima ya mutindu yina!”

Mpe bakala ya yandi tubaka, “Kwenda na lweka. Bika yandi kota.”

¹³⁵ Mu kotaka kuna. Mpe kento yina vwanda kufwa na suka yina vwandaka landa. Ntangu mu vwandaka sambila samu na yandi, vision kutalanaka, mpe tubaka, “MUTINDU ME TUBA MFUMU.” Ya kele kieleka. Na suka yina vwandaka landa. . . Mu tubaka na yandi bangunga yikwa ya ke vwanda, ya kieleka kaka na mutindu nyonso, na ntangu yandi ke vutuka na mavimpi ya mbote na yinzo. Ba sekaka yawu, na kudongolaka. Mpe ngunga kaka mosi Mpeve-Santu zonzaka, yandi kwendaka na yinzo kento ya mavimpi ya mbote, mpe kele na mavimpi ya mbote bubu yayi. Yandi vwandaka muntu ya Katolika. Bawu vwandaka bantu ya Katolika. Bawu *vwandaka* ya Katolika.

¹³⁶ Ntangu beno ke kuzwa Nsemo. . . Na Ngwisani ya Ntama. . . Beno bika mu lakisa beno kidimbu ntangu yayi. Beno kuwa mbote, na manima mu ke kwenda mbala mosi na dilongi ya munu. Beno tala, na Ngwisani ya Ntama, ntangu mpika vwandaka na yisi ya kimpika, mpe kuna yandi vwandaka. . . Ba sumbaka yandi kuna, na ntalu mosi. Yandi zolaka sadila mfumu yina tii mvula ya jubilé. Mpe ntangu mvula ya jubilé vwandaka kwiza, ya vwandaka na mpungi yina vwandaka bula.

¹³⁷ Mpe ntangu mpika vwandaka kuna, yandi na bana ya yandi, mpe kento ya yandi mpe bawu nyonso vwandaka vingila na kuvutuka na yinsi ya ntama. Bawu vwandaka tambula na bilanga na kutambula ya kudema, mpe mfumu ya bisalu vwanda bula bawu, mpe mutindu *yayi* mpe mutindu *yina*. Mpe kuna ntangu nganga-Nzambi ya jubilé vwanda luta, na kubulaka mpungi, mpe nganga-nzambi yina vwandaka bula mpungi, mpe muntu yina vwandaka kuwa mpungi. Yandi zolaka losa nsengo ya yandi, yandi zolaka losa nyonso yina yandi vwandaka sala, ke tala na kizizi ya mfumu ya bisalu, mpe kutuba, “Nge lenda bula dyaka munu mbala mosi ve. Mu me kuzwa kimpwanza.” Yandi vwandaka kwenda mbala mosi mpe vwandaka kwenda na yinzo. Samu na yinki? Ya kele na muningu ya jubilé, ntangu bawu kuwaka muningu.

¹³⁸ Mpe yina kele Nsangu ya mbote, jubilé, ti beno me kuzwa kimpwanza ya disumu. Beno me kuzwa kimpwanza na bankadulu nyonso yayi ya yimbi mpe na bima yina yinza me basisa awa na nkumbu ya nsambulu, na yisi ya ba-Protestant mpe Katolisisme, na yisi ya kidimbu ya kibulu. Ya kele kieleka. Nge me kuzwa kimpwanza.

¹³⁹ Beno kele ya kukwika ve. Kasi kuna kana muntu yina mangaka na kuzwa yawu, kuna ba zolaka katula muntu yina kuna na kunata na poto ya autel ya dibuundu, mpe ba zola tula

yandi kidimbu, ba kutobula dikutu ya yandi. Mpe yandi zolaka vwanda kisadi ya mfumu yina ntangu nyonso yandi ke zinga.

¹⁴⁰ Mpe beno ke manga na kundima Nsemo ya Nsangu ya mbote ntangu Yawu ke longama na Ngolo ya Mpeve-Santu, na nzila ya Biblia, beno lenda kanga beno mosi nsuka ya beno ya Seko. Amen.

¹⁴¹ Ntangu yayi beno tala, mwa kima mosi dyaka, kana beno ke lemvočila munu na yina mu me sala mulabu mwa ntangu fyoti me luta, samu na—samu na muntu yayi. Kasi, beno tala awa, “Ke vuna Musoolami ya kieleka . . .”

¹⁴² Ntangu yayi, beto vwandaka tubila na ba-Luthérien, ba-Baptiste, mpe nyonso yina, mpe bantu ya Katolika, ntangu yayi beno bika mu kulumuka na beno bantu ya busantu kaka mwa ntangu fyoti. Beno me mona? Mu ke kwikilaka na busantu. Beno fwana vwanda ya santu. “Kukondwa busantu muntu ve ke mona Nzambi.” Busantu ya munu ve; busantu ya Yandi. Mpe kima mosi ve mu lenda sala samu na yawu; ya kele yina Yandi salaka samu na munu. Mu ke tala na munu mosi ve, samu ti mu kele na ata mosi ve, mu ke meka mpe ve na kuzwa mosi. Mu ke meka ve na ku—kuvwanda.

“Nge ke meka na kutelemina, Mpangi Branham?” Ve, tata.

¹⁴³ Mu ke bika yawu, mpe mu ke bika Yandi kutelemina. Ya kele kieleka. Yandi kele Yandi Yina ke na kutelemina. Beno vwanda kaka ya kufwa, ya kele kaka yina beno fwana kusala. Beno vwanda kaka ya kufwa, Yandi ke telemina. Yandi teleminaka yimeni. Yandi telamaka kuna tii Yandi tubaka, “Ya me manisa.” Yina sukisaka dyambu. Nzambi ke na kubikaka beto kusala yawu, mutindu mosi. Ya me manisa.

¹⁴⁴ Kasi, bantu ya busantu, beno ba-Nazaréen mpe ba-Pèlerin ya Sainteté ntangu yayi, beno bambuka moyo. Na yisi ya ngolo mpe kubasikaka na dibuundu ya Wesley, to na dibuundu ya ba-Methodiste, na ntangu bawu salaka organisation, beno bantu ya luzolo ya busantu kubasikaka, tubaka, “Beto ke landila na busantu.” Ya vwandaka mbote mingi. Beno landilaka kaka na nsungi yina, na Nsungi ya Philadelphie yina, tii ya kumaka na Laodicée. Kasi ntangu mbotika ya Mpeve-Santu kwizaka, mpe bidimbu vutukaka na dibuundu, beno bokilaka yawu “dyabulu.” Samu ti bawu vwandaka zonza na bandinga mpe vwandaka kwikila na bima yayi, beno tubaka, “Ya vwandaka ya dyabulu.” Mpe ntangu beno salaka yawu, beno vwezaka na Mpeve-Santu.

¹⁴⁵ Wapi mutindu mu lenda tuba na diboko ya munu, “Mu kele na nsatu ya nge ve”? Kana ya kele na milongisi, ya kele na kuzonza na bandinga. Kana ya kele na ba-evangeliste, ya kele mpe na makabu ya kubeluka ya nzutu. Wapi mutindu dikulu lenda tuba na disu, “Mu kele na nsatu ya nge ve”? Beno me mona? Beno, kana beno kele mwana ya Nzambi, beno ke tambula

mpe ke ndima nyonso yina Nzambi ke tuba kele kieleka. Beno ke tambula mbala mosi na kati ya Nsemo.

¹⁴⁶ Ntangu ya vwandaka ntangu samu na Dibuundu na kutambula, Luther kutambulaka. Ntangu ya kumaka ntangu samu na Dibuundu na kuningisa diboko ya Yawu, Wesley ningisaka diboko. Ntangu ya kumaka ntangu samu na Dibuundu na kuzonza, Pentecote kotaka na kisalu. Ya kele kieleka. Kasi, ntangu yayi, beno tala.

¹⁴⁷ Beno ke tuba, “Mpe kifwanukusu?” Beno ke tuba, “Ya kele kifwanukusu ya yawu?” Yinga, tata.

¹⁴⁸ Beno zaba ti Judas Iscariot, mbeni ya Klisto ya kieleka, vwandaka musambidi ya kieleka? Beno zaba yawu? Bawu vwandaka na kivuvu mingi na yandi, bampangi, ti yandi vwandaka trésorier ya dibuundu.

¹⁴⁹ Mpe Judas Iscariot vwandaka ya vedisa na lukwikilu, na kukwikilaka na Mfumu Yesu Klisto.

¹⁵⁰ Yandi vwandaka ya kusantisa na nzila ya Ndinga. Hébreux, 17:17. . . mu zolaka tuba, Santu Jean 17:17, “Santisa bawu, Tata, na nzila ya Kieleka; Ndinga ya Nge kele Kieleka.” Mpe Yandi vwandaka Ndinga.

¹⁵¹ Mpe ba pesaka bawu ngolo ya kukwenda mpe kulonga Nsangu ya mbote, mpe kubasisa bampeve ya yimbi, mpe kubelusa bambevo. Judas Iscariot, na Matthieu 10, vwandaka na kati-kati ya bawu. Mpe bawu kwendaka mpe basisaka bampeve ya yimbi, mpe longaka Nsangu ya mbote na mutindu yina tii misumuki fungunaka masumu mpe bampeve ya yimbi basikaka. Mpe bawu vutukaka na kuyangalala mpe vwanda boka, mpe vwanda kuzwa ntangu mosi ya nene, mutindu mwa lukutakanu mosi, ya kan ya busantu. Mpe Judas vwandaka kaka na bawu. Ya kele kaka kieleka, kaka kieleka na bawu.

¹⁵² Kasi ntangu ya kumaka ntangu ya Pentecote, Judas lakisaka bantinta ya yandi.

¹⁵³ Ya kele kisika dibuundu ya busantu ke lakisaka bantinta ya yawu, kaka kuna, mpe me baluka kaka kuna mpe me manga Mpeve-Santu ya kieleka yina vwandaka twadisa bawu na kati ya maza ya mudindu, me baluka kaka kuna mpe me manga Yawu.

¹⁵⁴ Mu zaba ti ba me kuzwa mingi ya fana-. . . Mu kele Pentecotiste ve. Mu me vwandaka ntete ve ya organisation ya ba-Pentecotiste, ata mbala mosi ve. Mu me telemaka na kati-kati. Mu kele ve Pentecotiste, Methodiste, Baptiste. Mu kele kaka Muklisto ya Biblia. Kaka yina. Mu ke kwikila yina Ndinga ke tuba. Mpe mu lenda manga ve dikabu ya kuzonza na bandinga; kana mu sala yawu, mu ke manga malongi mpe dikabu nyonso yankaka ya kimpeve. Ya kele kieleka. Ata mbala mosi ti mu me ndimaka bampangi ya ba-Pentecotiste ti kuzonza na bandinga kele “nzikisa kaka yina kele”. Mu ke salaka yawu ve. Ntangu

yayi, ya kele mbote, kana bawu ke kwikila yawu mutindu yina. Ya kele dyambu ya bawu, beno me mona, kasi ya kele kieleka nyonso ya kulunga. Mu . . . Paul tubaka, “Mu zola ti beno nyonso kuzonza na bandinga.” Mu ke zola kumona muntu nyonso kuvwanda pene-pene ya Nzambi.

¹⁵⁵ Beto kele na bima mingi yina bantu me sala, mingi ya lukwikilu ya luvunu. Bawu basikaka kuna, bambala mingi, mpe salaka mutindu ti bawu vwandaka na Mpeve-Santu, mpe tubaka kima yina vwandaka kuzonza na bandinga ve. Luzingu ya bawu lakisaka yina ya vwandaka. Kasi ya me vwanda na kima ya kieleka yina ke landila kaka na kukwenda mutindu mosi, ntangu nyonso.

¹⁵⁶ Mbote, samu na yinki dyabulu zola kulosa ve nkundi, mutambu ya ngoy-ngoy? Kieleka, yandi lenda, samu na kusala kikaku. Yandi losaka kima ya mutindu mosi na busantu. Yandi losaka kima ya mutindu mosi na ba-Methodiste. Yandi losaka kima ya mutindu mosi na kilumbu ya Luther. Mpe yandi ke na kulosaka kima ya mutindu mosi bubu yayi. Mpe na yisi ya ngolo ya makabu, ya kubeluka ya Kinzambi mpe kuswasikisa mabanza, yandi ke na kulosa bima ya mutindu mosi.

¹⁵⁷ Kasi yinki zola kutuba kima yina ke bangisa samu na beno, kana beno lendaka zonza ndinga ya bandeke? Bandede ke tuba, “Ntangu mu ke mona kima yina ke bangisa, ya kele kudya ya mbote. Ba-pomme ya mbote yina kele, kele kaka na ziunga kisika bankonga nyonso kele mpe bima yina ke bangisa kele ya kulelika kuna.” Ya kele kieleka.

¹⁵⁸ Kasi beno mona mutindu mpeve yina me kwenda kaka na ntwala tii awa. Mpe Yesu talaka mpe monaka yawu na ntwala na nzila ya dibuundu ya Katolika yina, kotalana. Yandi tubaka, “Beno bokila muntu ve tata. Beno vutukila ve kuzonza ya mpamba, bima nyonso yayi.” Yandi kwizaka mpe tubaka, “Ntangu yayi beno sala keba, mbeni ya Klisto ke vwanda ya kufwanaka mingi tii ya ke vuna Misoolami ya kieleka kana ya lendaka salama.”

¹⁵⁹ Beno tala, mpangi, bamwense yikwa kwendaka kutana na Mfumu? Kumi. Bawu nyonso vwandaka mwense. Yinki *kisantu* zola kutuba? “Kuvedila, santu, mwense.” Kumi ya bawu vwandaka bamwense. Tanu vwandaka ve na Mafuta na mwinda ya bawu. Tanu vwandaka na Mafuta na mwinda ya bawu. *Bayayi* tanu vwandaka kaka santu mpe mwense mutindu *bayankaka* vwandaka. Kasi yinki *Mafuta* ke talisa, na kati ya Biblia, kisika beto bakaka yawu mazono na nkokila, mazusi na nkokila? Mpeve, “Mpeve-Santu.” Bawu sukulaka bawu mosi mpe bawu vwandaka kuna, kasi bawu vwandaka na boma mpe vwandaka ntama ya Yinto yina vwandaka dukula Mafuta. Beno me mona, bongisaka bawu mosi mpe vwandaka mpe kuna bawu yina, ya tiya ve madidi ve. Ya kele kisika nsungi ya dibuundu kwendaka.

160 Ntangu yayi, awa beto ke na kukuma na kidimbu ya Nzambi. Ya me bikana munu baminuti makumi tatu, kana Mfumu zola. Ntangu yayi mu zola ti beno kubaka na munu, na ntete, samu beno tala mutindu mfunu, kidimbu yayi ya Nzambi kele.

161 Beno bambuka moyo na yina kidimbu ya kibulu kele; communisme ve. Kidimbu ya kibulu ke katukaka na Rome, na yinza ya muvimba; Malongi ya Katolika, na malongi ya ba-Protestant ya kuvukana na yawu, nsambulu ya kubongisa. Mpe bawu ke vukana na mabuundu tii dibuundu nyonso fwana fukimina kima yina, baya ya beto ya tabernacle yina ke yamba bantu nyonso ba ke losa na lweka. Ya kele kieleka.

162 Apocalypse kapu 9 ntangu yayi. Beto tanga kieleka mbote awa mwa ntangu fyoti, kana Nzambi kuzola, mpe kutala yina Yandi tubaka na Ndinga ya Yandi. Ntangu yayi. . . [Kisika ya mpamba na bande—Mu.] . . . ya—ya Apocalypse, mpe nzila ya 4. Beno kuwa yayi.

Mpe ba yiminaka bawu (na ntangu bawu monaka bampasi kumwagana) na kusala yimbi na matiti to bayinti. . . to kima nyonso ya matiti ya mubisu, to yinti nyonso; kasi. . . bantu yina kele ve na kidimbu ya Nzambi na mbunzu ya bawu.

163 Na ntangu bampasi vwandaka kwiza, kima kaka kukebamaka vwandaka bayina vwandaka ya kutula kidimbu na Kimfumu ya Nzambi. Yayi kele kufiongonina ya lufundusu, ntangu bantu. . . Mpe kana Nzambi lenda sadisa munu, na mwa baminuti fyoti beto ke siamisa yawu na nzila ya Ndinga ya Mfumu, ti yayi kele ntangu ya kutula kidimbu ya kisika. Mpe ya kele na kima ve yina me bikana na bayina mangaka Yawu, kasi kitumbu ya Seko.

164 Ntangu yayi beto ke kwenda na Ngwisani ya Ntama. Mpe beto baka awa, kana beno zola, na Buku ya Ezéchiel, kana beno zola, ti beto tanga fyoti na Ezéchiel 9. Ntangu yayi, na lusalusu ya Nzambi ntangu yayi, ti Yandi kusadisa beto. Mpe kuvwanda swi ntangu yayi na malongi, landila kaka baminuti makumi tatu yina ke landa, kana Nzambi zola. Ntangu yayi yayi ke tala, beno sonika yawu, Ezéchiel 9, yayi ke tala. . .

165 Kima ya ntete beto fwana sungika ntangu yayi kele, yinki kele Kidimbu ya Nzambi? [Kisika ya mpamba na bande—Mu.] Beno banza ve ti ya ke vwanda mfunu? [Dibuundu me tuba, “Amen.”] Biblia kele Ndinga ya mbote ya kulunga samu na beno? [“Amen.”] Ntangu yayi mu zaba ti beno kele na yawu, bayina ke tubaka, “Zitisa kilumbu ya saba,” kasi ya kele ve na ata kima mosi na Masonuku samu na kulakisa yawu, na Ngwisani ya Malu-malu. Beto tala yina Kidimbu ya Nzambi kele, ya kieleka. Beno baka Éphésiens 4:30, 4:30, mpe 1:13. Beno sonika yawu. Éphésiens 4:30 ke tuba:

. . . *beno nyongisa ve Mpeve-Santu ya Nzambi, na yina na beno kutulamaka kidimbu tii kilumbu ya mpulusu ya beno.*

¹⁶⁶ Ntangu yayi, yinki zola kutuba *kutula kidimbu?* Kutula kidimbu kele “kidimbu ya kusukisa.” Ya kele kieleka?

¹⁶⁷ Mbote, beno me monaka ntete muntu ya masini kufulusa ba-wagon? Yandi ke kwenda mpe yandi ke tula mingi *awa*, mpe mingi *awa*. Muntu ke talaka ke kwiza, yandi ke tala; mpe kana *yayi kele* mwa ya kukanga ngolo ve, ya ke na kuningana, “Ve. Mu ke tula yawu kidimbu ve. Ba fwana kufungula yawu mpe kusala dyaka yawu.” Kima ke landa, yandi ke meka dyaka na kufulusa yawu; kana yandi sala yayi yimbi. Muntu ke talaka ke kwiza, “Ya kele mbote ve. Sala dyaka yawu.”

¹⁶⁸ Mpe ya kele yina Nzambi ke sala na dibuundu ya Yandi kubanda ntama. Beno ke fulusa, mpe beno ke na kwenda na Mazulu; beno ke na kubaka nyonso na beno. Nsaka ya beno ya bakalati, huh, nyonso yina beno lenda fulusa na dibuundu, beno ke meka na kubaka yawu na beno. Nzambi ke fundisaka kaka yawu; ya kele kaka ve ya kuyilama samu na kutula kidimbu.

¹⁶⁹ Kasi ntangu Nzambi ke mona muntu, ya kunyonga, ya mpeve ya kubukana, na ntima ya kusungama, na yisi ya autel, Nzambi ke kanga kyelo ya yinza na yandi, mpe ke tula yandi kidimbu na kati kuna na nzila ya mbotika ya Mpeve-Santu, mpe ya ke vwanda tii Yesu ke kwiza; ve katuka reveil mosi na yankaka, kasi, “tii kilumbu ya mpulusu ya beno.”

¹⁷⁰ Ntangu wagon yina, kyelo, me kangama, mpe kidimbu ya luyalu me tulama na zulu ya yawu, ba lenda fungula dyaka yawu ve tii ya ke kuma na kisika ya yawu ya nsuka.

¹⁷¹ Mpe muntu nyonso yina me butuma dyaka mpe me tulama kidimbu na Kimfumu ya Nzambi, kele dyaka ve na nsatu ya yinza tii kilumbu Yesu Klisto ke nata yandi na Kimfumu. Na yawu kana beno kele na mpasi, mpe beno ke tuba ti beno kele na Mpeve-Santu; ata ti beno kele ya dibuundu ya ba-Methodiste, dibuundu ya ba-Baptiste, dibuundu ya ba-Pentecotiste; ata ti beno bokaka, zonzaka na bandinga; kubotamaka na mantwala, na manima, ba mwangisaka mwa maza; kana beno ke na kuzwa dyaka mwa bampasi, beno fwana vutuka mpe kufyongonina kufulusa. Ya kele kieleka. Beno me baka ya kulutila mingi na beno; kieleka ya me kangama mbote ve, ya ke na kuningana. Nzambi ke tula yawu kidimbu na mutindu yina ve.

¹⁷² Ntangu mbuma ya ble ke kubwaka na ntoto, ata mutindu. . . Kana mbuma yina ya blé kufwa na yawu mosi, ya lenda basisa ve grateron, samu na kuvulusa moyo ya yawu. Mbuma ya blé ke buta mbuma ya blé, kaka kieleka mutindu kima nyonso. Mpe kana beto kele ya kukuna na Nkuna yina ke bola ve ya Nzambi, wapi mutindu Yawu lenda basisa kima yankaka kasi luzingu ya Luzingu ya Klisto?

173 Mpeve-Santu ke na kutwadisa Dibuundu, ke na kutwadisa Yawu na Ngolo ya mvumbukulu ya Yesu Klisto, mpe beno kele ya kutula kidimbu tii kilumbu ya mpulusu. Ya kele Biblia. “Beno nyongisa ve Mpeve-Santu ya Nzambi, na yina beno kele ya kutula kidimbu tii na kilumbu ya mpulusu ya beno.” Ephésiens 4:30.

174 Ntangu yayi, ntete Mpeve-Santu kukwiza, yandi kutulamaka kidimbu na ntete nsungi ya Bantu ya makanda kubanda. Yandi kele ya kutula kidimbu na yisi ya minda yayi ya wolo, beto kele na schema, samu na kubaka yawu, kuna na yisi ya nsungi yina.

175 Yandi landilaka na kukwenda na ntwala na bawu na nzila ya Abraham, Isaac, Jacob, David, mpe na yisi na nzila ya nsungi ya mpimpa yina bawu vwandaka na yawu na bilumbu ya Achab, landilaka tii na, Salomon, mpe nyonso yina, tii ya kumaka na kondisyo yina ya tiya ve madidi ve. Kasi kaka na ntwala Yandi kanga kilumbu yina kuna, Yandi pesaka ngolo ya nene ya Mpeve-Santu na ba-Juif, “Beno kwenda ve na nzila ya Bantu ya makanda, kasi beno kwenda na mameme ya kuzimbana ya Israël.” Ya kele kieleka? “Yandi kwizaka na baya Yandi, mpe baya Yandi kuyambaka Yandi ve.”

176 “Kasi bayina nyonso ndimaka Yandi, Yandi pesaka Ngolo ya kukuma bana ya Nzambi.” Yandi tubaka, “Mu ke pesa bawu Luzingu ya Seko.” *Luzingu* ya Seko me katuka na mpova ya Grec “Zoe.” Zoe kele Luzingu yina. Zoe kele Luzingu ya Nzambi. Mpe kana Luzingu ya Nzambi ke zinga na kati ya beno, ya ke buta luzingu ya busantu kaka mutindu mu kele ya kutelema na estrade yayi. Mpe muntu yina kele na Yawu, lenda kufwa dyaka ve mutindu Nzambi lenda kufwa ve, samu ti Nzambi kele na kati ya muntu yina. Amen. “Muntu yina ke kuwa Bandinga ya Munu, mpe ke kwikilaka na Yandi yina fidisaka Munu, kele na Luzingu ya kukonda nsuka, mpe ke kwiza ve na kitumbu; kasi kele na Luzingu ya kukonda nsuka.” “Yandi yina ke kudya nzutu ya Munu mpe ke kunwa Menga ya Munu, Mu ke vumbula yandi na kilumbu ya nsuka.” Yina kele Ndinga ya Yandi. Wapi kubomba samu na mukwikidi! Mpe wapi kitumbu samu na bayina ke manga na kutambula na Nsemo.

177 Ya ke na kukumaka tiya, mutindu yina ve? Mbote mingi, Ya kele mbote samu na beno. Beno tala, na kumona kana yayi kele kieleka. Bampangi, beto lenda baka yawu, Masonuku na manima ya Masonuku, sabala na manima ya sabala, sabala na manima ya sabala, mpe kuvwanda na zulu ya yayi, mbala mosi. . . na dilongi mosi, mvula mosi, kumanisa mpe yawu ve na Biblia, yawu nyonso, mpe kaka na nzulu ya kima mosi.

178 Ntangu yayi samu na mwa kima ya ntete awa, beto ke vutuka mpe ke tala yina kumanga mbotika ya Mpeve-Santu zola kutuba

samu na beno, yina ya vwandaka zola kutuba samu na bawu na kilumbu yina.

¹⁷⁹ Ntangu yayi, na Ezéchiel 9, profete monaka Jérusalem. Ntangu yayi beno bambuka moyo, beto ke na kuzonzila na zulu ya ntangu yina kuna, ba-Juif, kaka ntete nsuka ya bawu.

¹⁸⁰ Ntangu yayi beto kele na kati ya Bantu ya makanda, na nsuka ya bawu. Na manima beto ke kota na Millenium. Mbote mingi.

¹⁸¹ Kasi ntangu yayi beno tala mbote, beno ke na kumanisa na ba-Juif ntangu yayi. Profete monaka yawu na ntuala. Yayi kele dyaka bamvula nkama, na kutala bankama nana ya bamvula, ntete nkwezulu ya Mfumu, mpe profete pesaka profesu. Ntangu yayi beno kuwa mbote na yina beto ke tanga.

Yandi tubaka na ndinga ya ngolo mpe na makutu ya munu na ndinga ya nene, tubaka, Beno belemisa bayina kele na kizitu na mbanza, mpe konso muntu na mbele ya kufwila, to na mbele ya yandi ke bebisaka na diboko.

¹⁸² Ntangu yayi beno tala mbote ntangu yayi na yina beto ke tanga.

Mpe, tala, bantu sambanu me katuka na . . .mwelo ya zulu mingi, yina kele na lweka ya node, mpe konso muntu na mbele ya kufwila na diboko ya yandi; mpe muntu mosi na kati ya bawu, na bilele ya mpembe, vwandaka ya kulwata na lino, na eklitwale na lweka ya yandi: mpe bawu kwendaka . . .mpe telamaka na ntuala, na lweka ya autel ya kisengo.

Mpe nkembo ya Mfumu Nzambi ya Israel mataka na cherubin, na zulu ya yina yandi vwandaka, tii na nkotolo ya yinzo. Mpe yandi bokilaka muntu ya kulwata na lino, yina vwandaka na eklitwale na lweka ya yandi; (beno kuwa)

Mpe MFUMU tubaka na yandi, Luta na kati-kati ya mbanza, na kati-kati ya Jerusalem, (mambu yina ke salama na Jérusalem), mpe tula kidimbu na zulu ya mbunzu ya bantu yina ke nyonga mpe . . .ke dila samu na busafu . . .yina ke . . .kusalama na kati-kati ya yawu.

Mpe na yina na bayankaka yandi tubaka na dikutu ya munu, Kwenda . . .na manima ya bawu na mbanza, mpe beno bula: mpe ti disu ya beno kutala mawa ve, to ti . . . tala kyadi:

Beno kufwa bawu nyonso biboba mpe bantwenya, bisadi, . . .bana ya fyoti, mpe bakento: kasi beno belama ve na mosi na zulu yina . . .kidimbu; mpe yandi banda na santuwele. Mpe . . .bandaka na bantu ya kukula yina vwandaka na ntuala ya yinzo.

183 Ntangu yayi beno tala mbote profete yayi na kati ya Mpeve, kunatama na Nkembo. Nzambi tubaka, “Mu ke lakisa beno mutindu mu ke sukisa yawu na ba-Juif, na ntwala ya kukwiza na Bantu ya makanda.” Beno tanga nzila, to kapu na ntwala ya yawu. Ntangu yayi, ntangu yandi kwizaka na kati kuna, yandi tubaka, “Mu monaka. . .” Ya ntete, yandi monaka disumu na kati ya mbanza, mutindu yandi monaka ntete ve, mpe yandi monaka Jérusalem. Ntangu yayi beno bambuka moyo, ya kubamaka kaka na ba-Juif, na Bantu ya makanda ve; ba-Juif, mpe na mbanza ya bawu ya nene, Jérusalem. Kaka mutindu mazono na nkokila, beto kubikaka yawu samu na ba-Protestant; ntangu yayi, na nkokila yayi, ya kele na ba-Juif. Yandi tubaka, “Luta na mbanza.” Awa kwizaka bantu na bambele ya kufwila na maboko ya bawu, bayina vwandaka kwenda na kufwa nyonso na kati ya mbanza. Yandi tubaka, “Ntangu yayi simba kaka yawu, kaka ntangu fyoti.”

184 Mpe na kati kuna me basika Muntu mosi ya kulwata bilele ya mpembe. Beto telama mwa minuti. “Ya kulwata bilele ya mpembe,” ludedomo, busantu. “Ya kulwata bilele ya mpembe,” Yina vwandaka na eklitwale na lweka ya Yandi. Yandi tubaka, “Luta ntete na mbanza, na ntwala bawu luta, mpe tula kidimbu na zulu ya mbunzu, kidimbu na zulu ya mbunzu ya muntu nyonso, kento, mwana ya bakala, mpe mwana ya kento, na kati ya mbanza, yina ke na kunyonga mpe ke na kudila samu na busafu yina me salama na mbanza, samu na masumu ya bantu.” Tula kidimbu na zulu ya bawu!

185 Mpe kuna, na manima Yandi me luta mpe me tula kidimbu, Yandi me vutuka mpe me tuba, “Ya me salama.”

186 Na manima Yandi fidisaka bantu, na kutubaka, “Beni kwenda, mpe beno tala mawa na kima ve, kasi beno kufwa na muvumba nyonso yina kele na kidimbu ve na zulu ya yandi.”

187 Beno tala awa, mpangi. Mutuli-kidimbu yina vwandaka kima yankaka ve kasi Mpeve-Santu.

188 Mpe beno tala, kana Yandi kwiza na Jeffersonville, na nkokila yayi, na Branham Tabernacle, to na tabernacle nyonso yankaka na mbanza, to na dibuundu mosi yankaka, nani Yandi ke tula kidimbu na zulu, yina vwandaka ya bukieleka mingi mpe ya kusungama na ntwala ya Nzambi ti bawu nyongaka mpe dilaka, mpe sambilaka ntangu mpe mpimpa, samu na disumu ya mbanza?

189 Yinki Yawu ke sala na milongi yina ke bika bakento ya bawu kubasika awa na bilele ya kuyobila, mpe kubasika na bakupe, mpe kutambula na kumataka mpe kukulumukaka babala-bala; mpe kuyimba na korale, mpe kupakula mpe kusala mutindu ba-Jezabel. Mpe ntangu. . . Babakala ke kuna, ke kunwa makaya, mpe ke kunwa malafu, mpe ke sala bima, mpe ke ke bula bansaka ya mbongo, mpe nyonso yina yankaka! Mpe bawu ke

sala mutindu ti yawu me tala bawu ve; ke kwenda na bankokila ya kudya nsusu ya nene, to na feti kisika mosi. Ke vwanda na yinzo na Kilumbu ya tatu na nkokila mpe ke tala televisyo, na kisika kukwenda na lukutakanu ya lusambulu. Na été, ke kanga dibuundu, na kisika ya kuzwa balukutakanu. Yinki Yandi ke tula kidimbu?

¹⁹⁰ Yina beto kele na yawu nsatu, na nkokila yayi, kele mingi ya yayi awa ya kumina na mpasi ya malongi ya nsangu ya mbote ya Hollywood! Mpe reveil ya mutindu ya ntama, yina Nzambi me fidisa, babakala mpe bakento yina ke fukama na autel! Mpe kubika kupesa ya maboko yayi, mpe kunangula maboko, mpe kumwangisa mwa-maza na bantu, mpe kubotika kizizi na ntwala, na manima, mpe mitindu nyonso yankaka ya fyoti yayi mpe ya ba-isme. Mpe kukulumuka ya kieleka, ya kunyonga, na mpeve ya kubukana, kisika disumu kele. Kuvukisa yawu kintwadi, mpe kubanda kuboka na mutindu ya ntama, ya mbutukulu ya malu-malu ya mwana. Amen. Ya kele mutindu yina ke kuzwa Mpeve-Santu. Ya kele kieleka.

¹⁹¹ Ata ti bawu kele Methodiste, Baptiste, to ya Katolika, to nyonso yina bawu kele! Ntangu bawu ke kwiza na ntwala ya autel yina mpe ke dila, ntangu mpe mpimpa, “O Mfumu Nzambi, tala masumu ya mbanza yayi! Ntima ya munu lenda pema ve! Mu lenda pema ve, Mfumu, na kumona bima yayi kusalama. O Nzambi, sala kima mosi! Fidisa beto reveil ya mutindu ya ntama,” kuna beno kele na ndilu ya kuzwa Mpeve-Santu, mpangi! . . . ? . . .

¹⁹² Kasi kana beno kwenda kuna samu ti beno me dumuka na zulu mpe na yisi, to samu ti beno binaka na musiki, to samu ti beno salaka kima yankaka; mpe ke kwenda bisika nyonso mpe ke zonza na ngolo, mpe ke kipe ve, mpe ke sala mangungu, mpe ke swana, mpe ke kwenda na dibuundu, mpe ke kwenda kisika na kisika; ya ke lakisa ti beno kele na kima ve na kubanda.

¹⁹³ Mpangi, yayi, ya kele nkisi ya ngolo mingi, kasi ya kieleka ya ke yidika beno. Ya kele kieleka. Yinga, tata. Ya ke basisa beno, kukondwa muntu mosi ya kulemba na kati-kati ya beno.

¹⁹⁴ Mutindu Moise. Mu ke zola kutala na bwate ya yandi ya bankisi, mutindu yina ve? Yandi vwandaka na mafuku zole ya bantu kuna. Beno ke zola kumona na bwate ya bankisi ya Moise, yina vwandaka na yandi? Na biboba nyonso yina, mpe bankama ya mwa ba-bebe yina vwanda butuka konso mpimpa, mpe bikata, mpe bantu ya kubela. Mpe ntangu yandi basikaka, na bamvula makumi yiya, ya vwanda na ata mosi ve—mosi ve ya kulemba mosi na kati ya bawu. Bayankaka ya beno badokotolo, ya kuvwanda awa na nkokila yayi, ke zola kumona bwate ya bankisi ya yandi?

¹⁹⁵ Beto tala na kati ya yawu mpe beto mona yinki ya kele. Ntangu yayi beto fyongonina. Beto ke tala. “Mu kele Mfumu yina

ke belusa nge.” Yawu yina. “Amen.” Ya kele yina ya vwandaka. “Mu kele Mfumu yina ke belusa nge.” Beto tuba ya kele na mwana ke butuka. “Mu kele Mfumu yina ke belusa nge.” Yandi kele na pneumonie. “Mu kele Mfumu yina ke belusa nge.” Ya kele lutumu kaka yina yandi lenda pesa. Ya kele kaka yina yandi vwandaka na yawu nsatu. Ya kele kaka yina yandi vwandaka na yawu. Ya kele yina Nzambi pesaka yandi.

Ya kieleka, bubu yayi, “Oh, beto ke kwikila na Yawu ve. Ve, ti. . .”

¹⁹⁶ Nzambi me sobaka ata mbala mosi ve. Yandi kele mutindu mosi. Kana mpeve yayi, ke landila mutindu bantu ke salaka bubu yayi, na yisi ya nkumbu ya Buklisto, pesaka Nzambi nsatu ya kuluka na ntangu ya ntama kuna, vwandaka “busafu” samu na bantu na kusala mutindu yina, ya kele busafu bubu yayi. “Yesu Klisto mutindu mosi mazono, bubu yayi, mpe kukonda nsuka.” Oh, mu ke kumitala musambidi.

¹⁹⁷ Beno tala, “Kwenda awa,” Yandi tubaka, “Luta na mbanza mpe Nge tula kidimbu na zulu ya bayina ke nyonga mpe ke dila samu na busafu yina me salama na kati ya mbanza.” Mpe kuna Yandi tubaka, “Na manima Nge me sala yawu,” Yandi basisaka bantu yayi na bambele ya kufwila, mpe bawu kwendaka mpe kufwaka nyonso.

¹⁹⁸ Ntangu yayi, muntu ya masolo, kaka na mwa ntangu fyoti. Yesu kwizaka na nsuni; Nzambi, kumonanaka na nsuni. “Nzambi vwandaka na kati ya Klisto, samu na kuvutula ngwisani kati ya yinza na Yandi mosi.” Mpe ntangu Yandi kwizaka na kati ya nsuni, Yandi kwendaka bisika nyonso vwandaka longa. Ba bokilaka Yandi, “Béelzébul; nganga-nkisi.” Ba vwanda seka Yandi, na mbutukulu ya Yandi, bima nyonso yankaka; mangaka Yandi, basisaka Yandi na ngaanda.

¹⁹⁹ Yandi tubaka, “Muntu nyonso yina ke tuba yimbi na Mwana ya muntu, ba ke lemvočila yandi, kasi muntu nyonso yina ke tuba yimbi na Mpeve-Santu, ba ke lemvočila yandi ata mbala mosi ve, na yinza yayi to na yinza yina ke kwiza.”

²⁰⁰ Yandi vukisaka mwa ba-Juif mosi kintwadi. Yandi kwendaka ve na Bantu ya makanda. Yandi kwendaka na ba-Juif. Ba fidisaka Yandi na ba-Juif; ya vwandaka ve kilumbu ya Bantu ya makanda. Mwinda ya nsuka vwandaka pela na kilumbu ya ba-Juif, mpe Yandi kwendaka kuna. Mpe ya vwandaka na bantu fyoti yina yambaka Yandi, yina ba bokilaka na kubasika.

²⁰¹ Ya kieleka kaka mutindu ya kele bubu yayi. Kaka mutindu Mpeve-Santu vwandaka zonza na nzila ya Yesu Klisto, na kubokila na kubasika kuna; mutindu mosi Mpeve-Santu ke na kuzonzaka na nzila ya Yesu Klisto, na kubokila na kubasika, bubu yayi.

²⁰² Bawu vwandaka kwikila na kimpeve. Bawu vwandaka tala mbote na Ntwadisi ya bawu. Bawu vwandaka tala

mbote na Yandi. Bawu zabaka ti Yandi vwandaka Ntinu ya baprofete. Bawu zabaka nyonso yina Yandi vwandaka. Yina Yandi vwandaka zonza, Nzambi vwandaka siamisa yawu mpe tubaka ya vwandaka Kieleka. Bawu zabaka ti bawu vwandaka na Kieleka. Bawu zabaka Nani bawu vwandaka kwikila, mpe bawu kwendaka na ntwala na Yesu.

²⁰³ Na yina bawu komaka Yandi na kulunsi. Yandi tubaka, “Tata, lemvočila bawu, bawu zaba mpe ve yina bawu ke na kusalaka.”

²⁰⁴ Kasi ntangu Kilumbu ya Pentecote kumaka ya kieleka, ya vwandaka na nkonga ya bantu ya mpamba, yina vwandaka dila, vwandaka boka mpe vwandaka landila. “Mpe ntangu Kilumbu ya Pentecote kumaka ya kieleka. . . .”

²⁰⁵ Na mbala mosi ngangana-Nzambi mosi kwizaka na nzila, na bwate ya dimpa ya kascher, bwate ya kominyo, tubaka, “Basisa ludimi ya nge ntangu yayi, mpe mu ke kunwa vinu?” Wapi buzoba! Kuna na nzila kwizaka mulongi ya Protestant, mpe yandi tubaka, “Beto ke kuzwa diboko ya kibakala ya kimpangi, mpe ke kuzwa bangonda sambanu ya kupekisa?” Huh! Buzoba! “Mu ke mwangisa nge mwa maza. Mu ke botika nge. Mu ke nata beno nzila yayi, ke kotisa beno na dibuundu, kupesa diboko ya kibakala ya kimpangi?” Buzoba!

²⁰⁶ “Kasi ntangu Kilumbu ya Pentecote kumaka ya kieleka, na mbala mosi katukaka na Mazulu mutindu mupepe ya ngolo, mpe Yawu fulusaka yinzo nyonso kisika bawu vwandaka. Milaka ya kukabuka vwandaka na zulu ya bawu, mutindu tiya.” Bawu bandaka na kubaba, mpe kukekama, mpe kubasisa mafulu, mpe kubasisa mate, mpe nyonso.

²⁰⁷ Beno ke tuba, “Ve!” Mu ke lakisa beno yawu na nzila ya Biblia. Yinga, tata. “Beno zola kutuba na munu ti ya kele yina bawu salaka?” Ya kele yina Biblia ke tuba.

²⁰⁸ Beno zaba ti Esaie pesaka profesu? Beno bika mu tangila beno mwa kima mosi na Esaie awa, kaka mwa ntangu fyoti. Esaie, kapu 28, mpe kubanda na nzila ya 8.

Samu ti mesa nyonso kele ya kufuluka na bilusi. . . (ke na kuzonzila na kilumbu yayi) . . . mpe bamvindu, na yawu ti ya kele ve na kisika ya kutsyema. (Mpangi, kana yina vwandaka ve kifwanukusu ya ba-Juif!)

Nani yandi ke longa luzabu? mpe nani yandi ke sala kubakula malongi? (beto ke na kuzonzila na Malongi, na nkokila yayi) . . . bawu yina ba me zenga madya milki, mpe bawu yina ba me zenga mabene.

Samu ti lutumu fwana vwanda na zulu ya lutumu, lutumu na zulu ya lutumu; musiku na zulu ya musiku, musiku na zulu ya musiku; . . . (ya kele mutindu Nsangu ya mbote ke kwizaka, kubanda Genèse tii Apocalypse!)

Samu ti na bikoba ya lunkukama mpe na ndinga yankaka Mu ke zonza na bantu yayi.

. . . mpe yayi kele kupema, ngemba yina mu tubaka zolaka kwiza. Mpe na nyonso yayi bawu vwandaka kuwa ve, kasi bawu vwandaka kwenda, vwandaka ningisa yintu ya bawu.

²⁰⁹ Yawu yina. Ya kele yina Yandi tubaka. Yina kele ndinga ya munu ve; ya kele Ndinga ya Yandi. Beno soba Yawu, kana beno lenda sala yawu. Ba lenda soba Yawu ata mbala mosi ve. Yandi tubaka, “Lutumu na manima ya lutumu; musiku na manima ya musiku; awa fyoti mpe kuna fyoti.” Nsangu nyonso ya mbote fwana kubasika.

²¹⁰ Nsangu ya mbote ya muvimba fwana banda awa, mpe bawu longaka Yawu. Mpe na ntangu bawu salaka yawu, Ngolo ya Mpeve-Santu kwizaka.

²¹¹ Mpe ba-Juif yina vwandaka seka Yesu, kasi bawu vwandaka seka, na kutubaka, “Ha-ha-ha! Bantu yayi me fuluka na vinu ya malu-malu.” Bawu tulaka kidimbu ya kisika ya bawu ya Seko. Bawu tubaka, “Samu na yinki ti beto lenda kuwa na bandinga ya beto mosi, kuzonza mambu ya mbote? Mbote, bantu yayi me fuluka vinu ya malu-malu. Ha-ha!” Ba vwandaka wenza mpe vwandaka seka.

²¹² Mpe Pierre, mwa mulongi yina ya exalté ya santu, ya sanduku ya sabuni, telamaka kuna na sanduku ya sabuni, dumukaka na zulu ya yawu, yandi tubaka, “Beno bantu ya Judée, mpe beno bayina ke zingaka na Jérusalem, ti yayi kuzabana na beno, mpe beno kuwa ndinga ya munu. Kasi yayi kele—yayi kele yina profete Joël kuzonzaka. Bantu yayi me fuluka ve na vinu ya malu-malu, mutindu beno ke banza, samu ti ya kele ngunga ya yivwa ya suka. Kasi yayi kele Yawu.” Yandi vutukaka na Biblia. Mu ke tubaka bambala mingi, “Kana yayi kele Yawu ve, mu ke bumba kaka yayi tii Yawu ke kwiza, kana ya kele na kima ya kuswaswana.” Kieleka. Yandi tubaka, “Yayi kele yina profete Joël kuzonzaka. Ya ke salama na bilumbu ya nsuka,” bamvula mafunda zole ya nsuka.

²¹³ Mafunda zole ya ntete, bebisaka yinza na maza. Mafunda zole ya zole, Klisto kwizaka. Na bamvula mafunda zole ya nsuka, “Mu ke mwangisa Mpeve ya Munu.” Alleluia! Ve “Mu ke pesa malongi na milongi mpe kutinda mwa banganga-Nzambi.”

²¹⁴ “Kasi Mu ke mwangisa Mpeve ya Munu ya Zulu; bana ya beno ya babakala mpe ya bakento ke pesa profesi; na zulu ya bisadi ya Munu ya bakento mpe bisadi ya Munu ya bakento mu ke mwangisa Mpeve ya Munu, mpe bawu ke pesa profesi. Mu ke lakisa bidimbu na mazulu, mpe na ntoto na yisi.” Ya kele yina ya vwandaka. Yina vwandaka nzibukulu.

215 Mpe ba-Juif yina vwandaka seka mpe vwandaka vwenza, mpe vwandaka tuba, “Bawu kele ya kufuluka na vinu ya malu-malu.” Yina tulaka kidimbu na kisika ya bawu ya nsuka.

216 Na mvula 96 ya ntangu ya beto, na nkwezulu ya Titus, yina katukaka na lweka yankaka, Jérusalem vwandaka ya kuzunga na basoda. Mpe beno zaba yina salamaka? Ba-Juif yina tubaka, “Ntangu yayi beto ke vutuka na yinzo ya Mfumu.”

217 Kasi bayina kuzwaka malongi mpe fulukaka na Mpeve-Santu. . .

218 Mutindu Josephe tubaka, “Bantu yina ya mutindu yina ke kudyaka bantu, beno vwanda kudya nzutu ya Yesu yayi ya Nazareth.” Yandi tubaka, “Ba bumbaka nzutu ya Yandi, mpe bawu vwanda kudya yawu.” Bawu vwanda kudya kominyo. Bawu vwandaka tuba ti bawu, nkonga ya bawu na ntangu kuna, “Ba-eretiki yina.”

219 Beno zaba bantu yina kuna ba vwanda bokilaka “eretiki”? Beno zaba yawu? Beno zaba yinki *eretiki* kele? Muntu ya “kulawuka.” Yinga. Beno tala Santu Paul.

220 Ntangu yayi, beno bantu, beno—beno ba-Baptiste ke zolaka kutuba, “Santu Paul, oh, mu ke kwikila yandi.” Beno bantu ya Katolika ke tubaka, “Oh, Santu Paul,” mpe ke pesa bézé bambala zole to tatu na makulu ya yandi, biteki yina kele kuna na Rome. “Santu Paul! Yinga, tata!”

221 Beno tala yina Santu Paul tubaka ntangu yandi vwandaka na ntwala ya Agrippa. Yandi tubaka, “Na mutindu bawu ke bokila kinzambi-nzambi,” exalté, “ya kele mutindu yina mu ke sambila Nzambi.” Amen.

222 Mu ke zola kupesa mbote na yandi; mu ke tuba, “Mu ke kwikila mutindu mosi, Paul! Alleluia! Yinga, tata, kima mutindu mosi! Bamvula funda mosi na nkama yivwa me luta, Paul. Mu ke kwikila dyaka kima mutindu mosi!” Kele dyaka na Mpeve-Santu; bidimbu mosi, mambu ya ngitukulu mosi, nyonso kaka mutindu mosi; ke na kulandila dyaka na kukwenda, na Mpeve-Santu mosi, ya kutula dyaka kidimbu tii (wapi ntangu?) kilumbu ya mpulusu.

223 “Nsangu ya mbote yayi ke longama. . .” Yinki? “Nsangu ya mbote!” Yinki kele Nsangu ya mbote? Ve “kaka Ndinga.” Paul tubaka, “Nsangu ya mbote me kwiza na beto, kaka na Ndinga ve, kasi na nzila ya Ngolo mpe kutalana ya Mpeve-Santu me kwiza Nsangu ya mbote.”

224 Paul tubaka, “Ata mbala mosi ve ti mu me kwiza na malongi ya seminere, ti me kwiza na bampova ya nene ya kitoko, samu ti mpulusu ya beno kuvwanda ya kutula na zulu ya bandinga ya nene mpe ya kubenda, mpe doxologie to credo mosi ya bantumwa, to kima mosi mutindu yina. Ata mbala mosi ti mu kwizaka na beno mutindu yina. Kasi mu me kwiza na beno

na kuzabaka kaka kima mosi, Ngolo ya mvumbukulu ya Yesu Klisto, mpe kumonisama ya Mpeve-Santu.” Alleluia! Ti Nzambi pesa beto dyaka mwa ba-Paul yina ke yidika ve kubula ya bawu, kasi yina ke tula Yawu kuna kukondwa . . . ? . . . kukondwa mwa basoseti ya seminere. Amen. Kidimbu ya Nzambi! Amen.

²²⁵ Ntangu yayi, ngunga yikwa me bikana na beto? Mingi, mutindu yina ve. [Dibuundu me tuba, “Amen.”—Mu.] Ya kele yina mu vwandaka banza. Ya kele ok. Mbasi kele Sabala, ata mosi ve ya beno ke salaka. Mbote mingi. Mbote mingi. Beno bambuka moyo, kaka—kaka baminuti fyoti.

²²⁶ Beno sambila! Beno tala, mpangi, yayi kele ntangu ya kusungama. Yayi kele ntangu yina beto fwana kukitala. Mu me telama awa ve samu na kusakana. Kana ya kele samu na yawu, mu ke kwenda na autel mpe kubalula ntima. Mu lendaka sala mutindu kusakana samu na bayankaka ya beno, kasi mu zola ve kuvwanda yawu. Mu ke salaka bantangu yankaka, mutindu kizoba; mu lenda sala ata kima ve. Kima mosi ke kwizaka na munu, ke sala ti mu sala mutindu yina, na yawu mu lenda sala kima mosi ve. Kasi na kati ya ntima ya munu, bampangi, mu ke kwikila Yawu na ntima ya munu nyonso. Na kutala bamvula makumi zole mu me longi Yayi na nzila ya chaire yayi, bisika nyonso na yinza, mpe Nzambi siamisaka Yawu na bidimbu mpe mambu ya ngitukulu. Amen. “Yesu Klisto mutindu mosi mazono, bubu yayi, mpe kukonda nsuka.” Yinga.

²²⁷ Ntangu yayi Yandi tubaka, “Belemisa na ntwala bayina kele na kinwanunu.” Ba mangaka na kuzwa kidimbu yina. Mpe Yandi kwendaka, mpe Titus bakaka bibaka ya Jérusalem, mpe bawu kimaka mbangu na kati ya mbanza; bawu bikaka bawu kufwa nsatu na kati kuna, tii bawu tokisaka bana ya mosi na yankaka mpe kudyaka. Bawu vwanda kudya bampusu ya bayinti, matiti ya bilanga. Mpe kuna na nsuka ntangu bawu zolaka bika . . . Titus, ntangu yandi kotaka na Jérusalem, yandi bebisaka ya muvimba nyonso na kati kuna, bawu kufwaka bakento, bana, ba-bebe, banganga-nzambi, nyonso yina, mpe bawu yokaka mbanza.

²²⁸ Mpe Yesu tubaka, “Ya ke vwanda na ntangu mosi ya ke bikana na ata ditadi mosi ve.”

²²⁹ Bawu tubaka, “Tala cathédrale ya beto ya nene. Mpangi, beto kele ba-Baptiste, to ba-Methodiste, to ba-Pentecotiste, to nyonso yina ya kele.”

Yandi tubaka, “Ya ke vwanda na ata ditadi mosi ve yina ke bikana na zulu ya yankaka.”

²³⁰ Yina ke talisa ti “Nzambi ke zingaka ve na bayinzo yina me salama na maboko.” Nzambi ke zingaka na kati ya bantima ya bantu. “Samu ti nzutu Nge me kubika Munu.” Mpeve-Santu ke zingaka ve na kati ya yinzo. Yawu ke zingaka na kati ya ntima. Beno tala tempelo. “Beno zaba ve ti beno kele batempelo ya

Nzambi ya moyo?" Amen. Kana beno tunga tempelo, beno tunga dibuundu, ti lukwikilu ya beno nyonso me tungama na ziunga ya tempelo ya beno to na dibuundu ya beno, na kiteki ya yinti, beno ke na kubaka kidimbu ya kibulu mpe zaba yawu ve. Ya kele kieleka. Beno ke pepa kuna mpe ke bebisa ntangu ya beno nyonso, milongi, samu na kusimbidila organisation ya beno, mpe beno ke kwenda kaka mbala mosi na difelo na yawu mutindu beno lendaka kukwenda.

²³¹ Mu ke tuba na beno, bampangi, yayi kele ntangu bantu ke vumbuka mpe ke longi Nsangu ya mbote na Ngolo ya Mpeve-Santu, bisika nyonso, na kubokilaka ba-Methodiste, ba-Baptiste, ba-Presbytérien, Bakatolika, mpe nyonso, na kulunsi ya Yesu Klisto.

²³² Ntangu yayi, beno ke tuba, mvungi ya ntama vwanda vwandaka na bwiki, ke tula yawu na zulu ya ditadi. Ntangu dimeme ya kubela ke pela, yandi ke beluka.

²³³ Bampangi, mu kele na sake ya muvimba ya kufuluka na yawu awa, na nkokila yayi. Mpe mu ke tula yawu na zulu ya Ditadi, Klisto Yesu, mpe dimeme ya kubela lenda pela mpe kubeluka ya nzutu. Ya kele kieleka. Bampangi, beno kuwa, mu ke tula yawu ve na zulu ya dibuundu mosi. Ya kele ve ya dibuundu mosi. Ya kele na Klisto. Ya kele kaka kieleka.

²³⁴ Ya misiku! "Oh, yinga, beto ke kwikilaka na Klisto." Bisalu ya beno ke monisa yina beno ke kwikilaka.

²³⁵ Yesu tubaka, "Bidimbu yayi," k-e, "ke landa bayina ke kwikila, tii na nsuka ya yinza. Mpe na Nkumbu ya Munu ba ke basisa bampeve ya yimbi, ke zonza bandinga ya malu-malu; kana bawu simba nyoka, to kunwa nkisi ke kufwaka, ya ke sala bawu yimbi ve. Kana bawu tentika maboko ya bawu na zulu ya bambevo, bawu ke beluka." Ya kele yina Yesu tubaka. Ya kele Badinga ya nsuka yina basikaka na bikoba ya Yandi. Mpe ba zangulaka Yandi na Mazulu.

²³⁶ Mpe bantu yina ke kwenda, mpe ke kwikila mpe ke longi Kubeluka ya Kinzambi, mpe bangolo ya Nzambi, yinza ke bokila bawu "bilawu." Mpe Biblia ke tuba, "Kana bawu ke bokila Mfumu ya yinzo 'Béelzébul,' wapi mutindu dyaka bawu ke bokila bawu, bilandi ya Yandi?"

²³⁷ Ya kufundisa, kuna bawu vwandaka ya kulala, bawu nyonso kufwaka kaka ya kieleka. Kasi Josèphe tubaka, "Bantu yina. . . Miklisto yina—yina ya mutindu ya bantu, katukaka Jérusalem na Judée, mpe tinaka nganzi nyonso yayi." Ntangu yayi yina vwandaka ba-Juif, nsuka ya ba-Juif.

²³⁸ Na nswalu nyonso ntangu yayi, samu na mwa bamuniti fyoti yina ke landa, beto sukisa na Bantu ya makanda, na nswalu nyonso. Beto luta na Apocalypse kapu ya 7, kisika beto ke suka na kilumbu ya Bantu ya makanda. Kutala kana yayi kele kieleka to ve. Ya vwandaka kisika profete ya Ezéchiel 9 pesaka profesi

ya nsuka ya nsungi *yina*; ntangu yayi awa kele Mpeve-Santu ke na kupesaka profesi ya nsuka ya nsungi *yayi*. Beno kuwa mbote ntangu yayi na yina mu ke tanga na malembe.

Mpe na manima ya bima yayi . . .

²³⁹ Apocalypse 7 ntangu yayi, “Na manima ya bima yayi mu monaka bawanzio yiya . . .” Yina vwandaka minati-mpunda vwandaka kwenda na ntwala, na kapu ya 6, mpe mutindu ba vwandaka kwenda na ntwala; mpunda ya mwa mpembe, mpe mpunda ya ndombe, mpe mpunda ya mbwaki, mpe nyonso yina, ti, minati-mpunda yina tambulaka na mpunda yinsi kubanda ntama.

. . . Mu monaka bawanzio yiya ya kutelama na bansongi yiya ya ntoto, vwandaka kanga mipepe yiya . . . ti bawu mupepe zolaka fula ve na zulu ya ntoto, to na mubu, to na yinti nyonso.

²⁴⁰ Ntangu yayi beno tala mbote vision yina yandi monaka ntete. “Mu monaka bawanzio yiya ya kutelama na bansongi yiya,” bisika yiya na ziunga ya ntoto, wanzio, vwandaka kanga mipepe yiya. *Bawanzio* kele “minati-nsangu.” Biblia ke tuba mutindu yina. Mpe *mipepe* kele “bamvita mpe kunwana.” Yandi vwandaka kanga mipepe yiya, awa, . . . ? . . . Ntangu yayi beno tala mbote, nzila ya 2.

Mpe mu monaka wanzio yankaka kukulumukaka na esete, na kuvwandaka na (k-i-d-i-m-b-u, kisalu me mania, na nzonzolo yankaka) . . . na kuvwandaka na kidimbu ya Nzambi ya moyo: mpe yandi bokaka na ndinga ya ngolo na bawanzio . . . bayina ya pesamaka na kutalisa mpasi na ntoto mpe mubu,

Na kutubaka, Beno talisa ve ntoto mpasi, to dyaka mubu, to . . . bayinti, tii beto ke tula kidimbu na bisadi ya Nzambi ya beto na mbunzu ya bawu.

²⁴¹ Beno tala mbote, mu ke landila na kutanga na yisi.

Mpe mu kuwaka lutangu ya bayina . . . tulaka kidimbu: mpe kuna vwandaka ya kutula kidimbu . . . vwandaka ya kutula kidimbu nkama makumi yiya na yiya ya fundu ya . . . dikanda ya—ya . . . dikanda ya bana ya Israël.

²⁴² “Ya dikanda ya Juda, kumi na zole . . .” mpe tii na yisi, mpe “Benjamin,” mpe “Gad,” mpe “Ruben,” tii na yisi na “Zabulon,” mpe tii na yisi na makanda kumi na zole, na nsuka ya nzila ya 8. Mpe bambala kumi na zole na bambala kumi na zole kele yikwa? [Dibuundu me tuba, “Nkama mpe makumi yiya na yiya.”—Mu.] Nkama mpe makumi yiya na yiya. “Nkama mpe makumi yiya na yiya ya mafunda,” ba-Juif nyonso. Ntangu yayi, beno tala mbote.

Mpe na manima ya yayi mu monaka, mpe, tala, nkonga ya nene ya bantu, yina muntu ve lendaka tanga,

ya makanda nyonso, bandinga nyonso, mpe bayinsi nyonso, . . .

243 Wapi kisika bawu katukaka? Beno me mona, beto me mona kisika yina ya nsuka ya ba-Juif; mpe ntangu ba pesaka muswa na bawanzio na kukwenda bebisa, ya ke tuba na kati awa, beto monaka mpe vwandaka “simba.” Kasi wapi kisika bayayi katukaka, ya makanda nyonso, ya bandinga nyonso, mpe ya bayinsi nyonso. Bawu monikaka.

. . . mpe ya bantu nyonso, mpe ya bandinga nyonso, telemaka na ntuala ya Mwana-dimeme, mpe na ntuala . . . vwandaka ya kulwata bilele . . . ya Mwana ya dimeme, ya kulwata ba-robe ya mpembe, mpe mandala na diboko ya bawu;

244 Kento ya makwela, Kento ya makwela ya Bantu ya makanda vwandaka ya kutula kidimbu awa. Beno tala mbote.

Mpe bawu bokaka na ndinga ya ngolo, na kutubaka, Mpulusu na Nzambi ya beto yina me vwanda na zulu ya kiti ya kimfumu, mpe na Mwana-dimeme.

Mpe—mpe bawanzio . . . yina telamaka na kuzungilaka kiti ya kimfumu, . . . bakuluntu, . . . bima yiya ya moyo, . . . mpe kubwaka na ntuala ya kiti ya kimfumu na bizizi ya bawu, mpe sambilaka Nzambi,

Na kutubaka, . . . (Beno kuwa, kana yayi ke wakana ve mutindu lukutakanu ya Mpeve-Santu!) Lu- . . . Balusakumunu, amen, nkembo, . . . ndwenga, . . . matondo, . . . lukumu, . . . ngolo, . . . lulendo, kuvwanda na Nzambi ya beto samu na ntangu nyonso mpe ntangu nyonso. Amen.

245 Ya ke wakana ve na munu, mutindu lukutakanu mosi ya ntangu nyonso ya kukabula ba-diplome ya baki. Ya ke wakana na munu, mutindu kima ya mutindu ya ntama, ya kutiamuka ya Mpeve-Santu. Bantu yina vwandaka kisika mosi; bawu zabaka yinki kusala ntangu bawu monaka Mwana-dimeme kuvwanda na Kiti ya kimfumu.

Mpe mosi ya bakuluntu . . . kutubaka na munu, Banani kele bayayi . . . mpe ya kulwata ba-robe ya mpembe? mpe wapi kisika bawu me katuka?

246 Ntangu yayi beno zabaka ba-Juif nyonso, kasi wapi kisika bayayi me katuka, “ya makanda nyonso, ya bandinga nyonso, mpe ya bayinsi nyonso”? Beno tala mbote.

Mpe mu tubaka na yandi, Tata, nge zaba. (Jean tubaka, “Mu zaba kaka ve.”) Mpe yandi tubaka na munu, . . .

247 Bayayi vwandaka bawu yina kuzwaka Yawu, mu banza. Mbote mingi.

. . . Bayayi kele bawu yina me basika na lukwamusu ya nene, (yina ba ke bokila “exalté,” yina ba ke seka, ke talisa mpasi, ba ke seka) . . . me basika na lukwamusu ya nene, mpe me sukula ba-robe ya bawu, mpe me kumisa yawu mpembe na menga ya Mwana-dimeme. (Beno tala!)

. . . bawu kele na ntwala ya kiti ya kimfumu ya Nzambi, . . .

248 Wapi kisika kento ke vwandaka? Wapi kisika ntinu ya kento ke vwandaka? Ya kele Kento ya makwela, Kento ya makwela ya Bantu ya makanda.

. . . mpe bawu ke sadila yandi kilumbu mpe mpimpa na tempelo ya yandi: . . .

249 Kento ya munu ke sadilaka munu na yinzo, kilumbu mpe mpimpa. Beno me mona? Ya kele Kento ya makwela ya Yesu; ya kele Kento ya makwela ya Bantu ya makanda.

. . . mpe bawu yina kele ya kuvwanda na zulu ya kiti ya kimfumu ke zinga na kati-kati ya bawu.

Bawu ke vwanda dyaka ve na nzala ya kudya, . . .

250 Alleluia! Bilumbu ya kusala me suka. Mbote, beto me kondwa kudya mingi, kasi beto ke kondwa ata mbala mosi ve Kuna. Amen.

251 Mu zaba ti mwa mama ya munu, ya mputu, ya kiboba kele ya kuvwanda awa na nkokila yayi. Mpe mu monaka yandi kutelama na mesa. Beto vwanda kudya kafe mpe dimpa ya ngolo. Yandi ke tiamuna yawu, ke tula mwa sukadi na zulu. Mpe ya vwandaka ve na mingi samu na ziunga; bana vwanda dila, mpe yandi vwanda telama mpe vwanda kwenda. Kasi beto ke sala yawu ata mbala mosi ve Kuna! Papa ya munu ya kiboba lalaka na maboko ya munu, na lweka ya bala-bala, kuna, mpe yandi kufwaka, na nsatu.

252 Kasi beto ke sala dyaka yawu ve. Alleluia! Ve, tata. Ata nsatu dyaka ve.

Bawu ke vwanda dyaka ve na nzala ya kudya, to dyaka bawu ya kunwa maza . . . dyaka nsemo ke lezima na zulu bawu, . . .

Samu ti Mwana-dimeme yina kele na kati-kati ya kiti ya kimfumu ke dikisa bawu, mpe ke twadisa bawu na bayinto ya maza ya moyo: mpe Nzambi ke kusuna . . . masa nionso ya meso ya bawu.

253 Ba lendaka sala mwa kudila mpe kulandila, ntangu Mpeve-Santu kwizaka. Kasi Nzambi ke kusuna maza nyonso ya meso na beno.

254 Beno tala mbote, yandi monaka “bawanzio yiya ya kutelama na bansongi yiya, vwandaka kanga mipepe yiya.” Na nswalu

ntangu yayi. Ntangu ya munu me kuma na nsuka, kasi beno bika mu talisa beno dyambu yayi, ntete mu sukisa. Beno tala, yandi monaka bawanzio yiya. Yandi monaka nsuka ya dibuundu ya ba-Juif, mutindu yandi monaka bawu kukwiza mutindu mosi; na kukwizaka na bambele ya yandi ya kufwila, basoda yina.

²⁵⁵ Ntangu yayi beno tala mbote. Wapi mutindu ya kidimbu Dibuundu ya Mpeve-Santu kuzwaka, mutindu kidimbu na mbunzu ya bawu? Ya vwandaka kidimbu ya kimpeve. Mpeve-Santu tulaka bawu kidimbu. Ya kele kieleka? Ata mbala mosi ve ti Yandi salaka nzoloko na yintu ya bawu, Yandi salaka yawu? Ve.

²⁵⁶ Bawu vwandaka ve ya kufundisa na yinsi mosi ya kukondwa lukwikilu. Bawu vwandaka ya kufundisa na nzila ya bawu mosi. Beno ke mona yina mu zola kutuba? Dibuundu ya kieleka ya Nzambi ya moyo ke fundama na Katolika mpe Protestant, samu ti bawu ke vukana kintwadi. Ba kele yimeni kintwadi mosi, mutindu mama mpe mwana ya kento.

²⁵⁷ Kasi bayayi, *awa*, vwandaka ve. Na yina, beno tala mbote yina Yandi salaka. Yandi tubaka, “Tula kidimbu na mbunzu ya bawu.” Wapi mutindu ya kidimbu ya vwandaka? Mu ke tanga yawu samu na beno, Actes 2. “Bawu nyonso vwandaka na ntima mosi na kisika mosi. Mpe na mbala mosi kuna me kwiza muningu, Wanzio katukaka Mazulu.”

Beno ke tuba, “Wanzio vwandaka muningu?”

²⁵⁸ Yinki ya vwandaka, yina kwendaka na ntwala ya David, ntangu yandi kuwaka mupepe ya ngolo ya makasa, ya makasa ya yinti mûrier, na nkokila yina ntangu yandi vwandaka na boma ya kukwenda kaka na ntwala? “Kuwaka muningu katukaka Mazulu mutindu mupepe ya ngolo,” Nzambi ke kwenda na ntwala ya bawu.

²⁵⁹ “Mpe na mbala mosi me monana na bawu Mpeve-Santu mpe Ngolo.” Kuna na babala-bala bawu kwendaka, ke kwenda na zulu mpe ke dumuka, mpe ke zonga na bandinga, mpe ke baba, mpe ke boka, mpe ke sala mutindu kinwa-malafu, mpe muntu nyonso ke sepela kaka mpe ke kumisa Mfumum Nzambi. Ya kele kieleka ve?

²⁶⁰ Ya kele mutindu Nzambi ke salaka ntangu Yandi ke tindaka Ngolo ya Yandi na mbotika ya Mpeve-Santu. Mpe Yawu kotaka mbala mosi kuna, mpe Nsangu kumwanganaka! Alleluia! Mpe bawu bokaka mpe bawu zonzaka na ngolo, mpe zonzaka na bandinga, mpe bawu kwendaka kuna. Mpe yina vwandaka kidimbu yina Nzambi tulaka na zulu ya bantu. Ya kele kieleka? Nzambi tulaka kidimbu, mpe ya kele mutindu ya kidimbu yina Nzambi ke tula na zulu ya bantu ya Yandi bubu yayi. Kidimbu mosi ya Nzambi yina vwandaka na zulu ya bawu kuna, na yisi ya mbotika ya Mpeve-Santu, vwandaka kidimbu ya Nzambi.

261 Mu zola kuyufula beno kima mosi, dibuundu. Biblia ke tuba ti kidimbu ya Nzambi, na kilumbu yina, vwandaka mbotika ya Mpeve-Santu. Kidimbu yina vwandaka na zulu ya bantu, samu na kuswasikisa bawu na bayankaka, vwandaka mbotika ya Mpeve-Santu. Ya kieleka? Ngwisani ya Malu-malu ke tuba, na Éphésiens 4:30, ti Mpeve-Santu kele kidimbu ya Nzambi, samu ti bantu na bilumbu ya nsuka, samu na kisika ya beno ya Seko. Ya kieleka? Na yina Mpeve-Santu vwandaka ya kusungama.

262 Ntangu yayi, beto kuzwaka nsungi ya ba-Methodiste, beto kuzwaka nsungi ya ba-Baptiste, beto kuzwaka kunungisama, beto kuzwaka kusantisama. Beto kuzwaka bima nyonso yayi, yina salamaka.

263 Mpe kaka pene ya bamvula makumi yiya me luta, mbotika ya Mpeve-Santu kulongamaka ya ntete na États-Unis. Ya kieleka? Pene ya bamvula makumi yiya me luta, ntangu bantu bandaka na kuzwa . . .

264 Ntangu yayi, bawu vwanda bokilaka yawu kosalu ya zole ya kieleka ya lemvo, kusantisama. “Kusantisama,” ya kele kieleka.

265 Ba fwana baka ntete vase, kulokota. Ya kele nyonso ya kufulukuka na potopototo. Ya ke nungisama, samu ti muntu me lokota yawu.

266 Kima ke landa, ba fwana sukula—sukula yawu mpe kubaka yawu. Mpova *kusantisa* zola kutuba “ya kusukula, mpe ba me tula na lweka samu na kosalu.” Kasi “ba me tula na lweka *samu* na kosalu” ya zola kutuba ve ti beno kele *na kati* ya kosalu.

267 Mpe kuna Yesu tubaka, “Kyese na bayina ke na nzala mpe mpwila ya ludedomo, samu ti beno ke fuluka.” Beno me mona, Mpeve-Santu kwizaka na mukwikidi ya kusantisama, ya kieleka, ya mbote, ya kusantisama. Mpe bidimbu mpe mambu ya ngitukulu bandaka na kotalana bawu mosi na ntangu yina vase yina ya kusantisama kusungamaka, mpe Mpeve-Santu kotaka na kati ya yawu. Beno me mona yina mu zola kutuba?

268 Beno lenda ve kubasisa mafuta na mbwata yina kana ya kele na mafuta na kati kuna, ata mutindu kutsyema mbwata kele. Beno lenda ve kubasisa kuzonza na bandinga, mpe kubeluka ya Kinzambi, mpe Bangolo ya Nzambi, na kima yina kele ve na kima mosi ya kati. Mpeve-Santu fwana kunatama, kuna.

269 Beno tala, pene ya bamvula makumi yiya me luta . . . Beto banza na manima. Beto ke tala, na nziunga . . . Beno tala mbote-mbote. Ya vwandaka na mfumu mosi ya nene yina basikaka, Mvita ya Ntete ya Yinza ya muvimba; mbala ya ntete na kati ya masolo ya yinza ya muvimba, mvita ya yinza. Wapi kisika yandi bandaka? Mbala mosi kuna na Allemagne. Yinki salamaka? Ya ngitukulu, muntu mosi ve zaba, tii bubu yayi, mutindu yawu sukaka. Muntu mosi ve zaba. Beno tanga *Nsuka Ya Mvita Ya Yinza*. Mu tangaka, bavolume nyonso ya yawu. Ya kele ve na muntu mosi . . . Kima kaka yina bawu zaba, ya vwandaka na

lutumu yina ba pesaka, “Beno bika!” Muntu ve zaba nani pesaka yawu. Samu na yinki?

²⁷⁰ O Nzambi! Beno ke bokila munu “exalté,” na mutindu nyonso, na yawu mu lendaka lakisa kuwa ya munu. Beno tala! Mutindu mu ke vutula matondo samu na Mpeve-Santu na kuvwanda awa na estrade, samu na kumonisa.

²⁷¹ Beno tala. Beno tala mbote. Bawu basikaka, mupepe nyonso vwandaka kwiza na yinza, na binwanunu ya malu-malu, samu na kubebisa ya muvimba bima nyonso na mvita ya yinza. Kasi, na mbala mosi, ya sukaka. Apocalypse kapu 7, ke tuba, “Mu monaka bawanzio yiya kukulumuka na bambele ya bawu ya kufwila. Mpe kuno kwizaka Muntu mosi katukaka esete, yina vwandaka na kidimbu ya Nzambi ya moyo; tubaka, ‘Beno kanga mipepe yiya.’”

²⁷² “Beno kanga yawu,” samu na yinki? Ba-Juif kele ntete ve na kisika ya kulunga. Nkembo! Ba-Juif kele ve na kisika ya kulunga, mutindu Nzambi silaka. Yandi tubaka na bawu kisika bawu ke vwanda, bawu ke vwanda kuna. Yandi tubaka, “Ntangu beno ke mona yinti ya fike kubasisa bintala, beno ti zaba ntangu me belama.” Mpe ntangu beno ke mona ba-Juif kuvutuka na Palestine, beno zaba ti ntangu me belama. “Nsungi yayi ke luta ve tii mambu nyonso yina ke salama.” Mpe, bampangi, na bamvula sambwadi ya nsuka kele mbala ya ntete yina dalapo ya ba-Juif me pepa ntete, na bamvula mafunda zole, kuna na zulu ya Jérusalem; yinga, bamvula bankama makumi zole na tanu. Amen. Ba-Juif vwandaka ve kisika ya kieleka ya zolaka salama, kasi Yandi tubaka, “Beno kanga! Beno kanga!”

²⁷³ Kasi, samu na yinki “kukanga”? Beno tala mbote, ya vwandaka dyaka na mwa Bantu ya makanda, na kati-kati ya nsungi ya Wesley mpe nsungi ya Pentecote, yina zolaka kota. Ntete Pentecote kukota na Nsungi ya Dibuundu ya Laodicée, ya vwandaka na “kyelo ya kuzibuka” ya kutula na ntwala ya dibuundu; kyelo ya kuzibuka, samu na, “Muntu nyonso zola kukwiza mpe zola kunwa na Yinto ya bamaza ya Luzingu ya ofele.” Kyelo ya kuzibuka, ya kutula. Oh, la la!

Mpe Yandi tubaka, “Beno kanga yawu!” Samu na yinki?

²⁷⁴ Yesu ke tuba, “Muntu mosi basikaka mpe yandi salaka. Mpe muntu yankaka basikaka, na ngunga yankaka, mpe yandi salaka. Muntu yankaka basikaka mpe salaka. Mpe mosi yankaka basikaka na ngunga ya kumi na mosi. Mpe ntangu yandi sukisaka na ngunga ya kumi na mosi, yandi pesaka mosi na mosi ya bawu kitini mosi, na ya ngunga ya kumi na mosi.”

Ba vwanda kumiyufula samu na yinki. “Samu na yinki yandi, kuzwaka na ngunga ya kumi na mosi, muntu nyonso yina kwizaka?”

²⁷⁵ Martin Luther yina salaka, tambulaka na yisi ya kilumbu ya Luther, kufwaka na lemvo! . . .? . . . bayankaka, kuboka ya ba-

Methodiste, yina kufwaka na yisi ya nsungi ya Wesley, kufwaka na lemvo. Beto ke na kuzinga na nsungi yankaka, ntama kuna ve. Awa! Mama ya munu vwanda tambulaka na kipusu ya ngombe, mpe beto ke tambula na modele V-8ya Ford, yina me pesama ngolo na kutala na masini ya ingeksyo. Ya kele kieleka. Beto ke na kuzinga na nsungi yankaka, na mutindu nyonso. Mpe beto ke na kuzinga na kilumbu yankaka. Beto ke na kuzinga na kilumbu ya kuvutula ya Bangolo ya Nzambi, mpe kaka awa kumona Ngolo ya Nzambi mutindu bawu salaka na mbandukulu. Beto ke na kuzinga na nsungi yankaka. Beno tala ve na manima kuna na Wesley, na ba-Méthodiste, mpe nyonso yina, ba-Baptiste, mpe ba-Presbytérien. Beno tala awa na Yesu Klisto, Mfumu mpe Mumanisi ya Lukwikilu ya Biblia. Alleluia!

²⁷⁶ Ntangu yayi beno tala Yandi mbote, kutuba, “Beno kanga yawu,” tii (yinki?) bantu ya ngunga ya kumi na mosi ke kota, mbokolo ya nsuka ya Bantu ya makanda. Mama salaka *kuna*; papa mpe bayankaka salaka *awa*; nkooko ya kento salaka *kuna* na manima. Yayi kele nsungi ya beto, ngunga ya kumi na mosi. Mvita yina ya Yinza kusukaka na ngonda ya kumi na mosi ya mvula, na kilumbu ya kumi na mosi ya kuzinga ya ngonda, na ngunga ya kumi na mosi ya kilumbu, mpe na minuti ya kumi na mosi ya ngunga; samu ti bantu ya ngunga ya kumi na mosi lendaka kota, (yinki?) kuzwa mbotika mosi ya Mpeve-Santu yina bawu kuzwaka *awa* na manima na mbandukulu, samu na kuvutula Ngolo mpe mvumbukulu ya Mfumu Yesu Klisto, na bidimbu mosi mpe mambu ya ngitukulu mosi.

²⁷⁷ Yinki ya kele? Bamvita ke bula *awa*, ke bula *kuna*, ke bula *awa*, ke bula *kuna*, na kumeka na . . . Ba-bombe atomique mpe nyonso yankaka yina ba ke na kusala, kasi bawu lenda sala yawu ve. Bawu lenda sala yawu ve tii ba-Juif ke kuzwa kutalana ya mbotika ya Mpeve-Santu. Wanzio tubaka, “Beno kanga yawu, tii beto ke tula kidimbu na bisadi,” Kento ya makwela ve. Bantu ya makanda ata mbala mosi ve me vwandaka kisadi; beto kele bana ya babakala mpe bana ya bakento. Beno tala bisadi, ba-Juif. Abraham vwandaka kisadi ya Nzambi. Alleluia! Ntangu yayi, bambala ya mafunda na bambala ya mafunda na mafunda ya ba-Juif. Nzambi kumisaka ngolo ntima ya Pharaon, samu na kunata bawu na Palestine. Nzambi kumisaka ngolo ntima ya Hitler, ntima ya Mussolini, ntima ya Staline. Yandi ke na kutwadisa na ngolo, na kukotisa na Palestine, na kuzabaka ve yina yandi ke na kusalaka, ke na kusalaka kaka na maboko ya Nzambi.

²⁷⁸ Bankama mpe makumi yiya na yiya ya mafunda ke telama kuna. Mpe mosi ya bilumbu yayi, profete mosi ya Kinzambi, ya santu, ya kukusa na Nzambi ke kwenda kuna na bidimbu mpe mambu ya ngitukulu. Ba-Juif yina ke tuba, “Ya kele yina mu ke na kusosa.” Yinga, tata. Mpe Nzambi ke botika nkama mpe makumi yiya na yiya ya mafunda ya ba-Juif.

279 Mpe Luzangulu ke salama; nsungi ya Bantu ya makanda ke suka. Bombe atomique ke mwangana mpe ke baka yinza. Mpe Dibuuundu ya Bantu ya makanda ke zanguka, samu na kutelama kuna na Mvwandulu ya Nzambi. “Nani kele bayayi yina me basika na lukwamusu ya nene? Bawu me sukula ba-robe ya bawu na Menga ya Mwana-dimeme. Bawu kele na mantwala ya Nzambi, kukondwa ditona.” Amen.

280 Kidimbu ya kibulu, kimvuka; ya mabuundu, Katolisisme, nyonso ya kuvukana kintwadi, ke kota na potopototo. Yina ke bikana, Kento ya makwela ya Mpeve-Santu.

281 Mpe bantu bubu yayi yina ke na kusekaka kuzonza na bandinga, yina ke na kusekaka kubeluka ya Kinzambi, yina ke na kusekaka profesi, yina ke na kusekaka kumonisama ya Kimpeve; mpe mpeve mosi yina yalaka ba-Juif yina ntama awa, yina vwezaka Mpeve-Santu na ntangu yina kuna, mpe kufwaka na yisi ya lufundusu ya Kinzambi. États-Unis yayi kele ya kuvukana samu na lufundusu ya Kinzambi, na yisi ya Ngolo ya Mpeve-Santu. Bawu me fundisa, mpe me seka, mpe me manga, mpe ke bokila beto “ba-exalté” mpe nyonso yina. Kasi ngunga kele awa, ntangu Nzambi ke mwangisa lufundusu ya Yandi ya Kinzambi. Amen.

282 Beno yilama. [Kisika ya mpamba na bande—Mu.]...?... Kisika kaka ya nkebolo yina kele bubu yayi kele na kati ya Klisto Yesu. Nzambi kusakumuna beno. Kana beno kele na kati ve, beno sala mbangu tii beno ke kota. “Bayina kele na kati ya Klisto Yesu kele bayina Nzambi ke nata na Yandi na Nkwizulu ya zole.”

283 Kukondwa kidimbu ya Nzambi, yina kele mbotika ya Mpeve-Santu, kimvuka ya apostazi kele kidimbu ya kibulu. Ya kele MUTINDU ME TUBA MFUMU. Beno me mona yina mu zola kutuba? Kasi milongi yayi ya lukwikilu ke na kumeka na kutula yawu na zulu ya komunisme, na yina bawu ke na kubakula ve ti ya ke na kusalaka kaka na kati-kati ya bawu mosi. Yandi tubaka, “Ya ke vwanda na bantwadisi ya bampofu samu na bampofu.” Yandi tubaka, “Ke vwanda na meso, kasi ke mona ve.” Yandi tubaka, “Beno, mpe na binkulu ya beno, ke zonza malongi ya bantu, ke sala misiku ya bantu, na kusalaka misiku ya Nzambi kulemba.”

284 Beno ke seka Katolika samu na kutulaka katekisima ya bawu, mpe bantu ya beno ke kwenda kaka awa na kimvuka mosi to na kima mosi, mpe ke baka lukanu kana bawu lenda kuzwa kubeluka ya Kinzambi, to mbotika ya Mpeve, mpe bima yayi. Mpe bawu ke fundisa Yawu mpe ke manga Yawu. Mpe beno ke seka Katolika. Beno kele ve na muswa ya kuseka Katolika. Samu ti, kana yandi wandaka “NDUMBA,” Biblia ke tuba ti beno kele “KENTO YA KINDUMBA,” na kati ya kimvuka mosi yina.

285 “Beno basika na kati ya yawu, bantu ya Munu! Beno kabuka,” me tuba Nzambi, “mpe Mu ke yamba beno Munu mosi.” Ya kele kieleka.

286 Oh, samu na yinki Branham Tabernacle yayi lenda basika ve na muvusu ya beto yayi? Mu zola zaba kana beno bantu awa ke kwikila Nsangu ya mbote yayi. Mpe ba me longa Yawu, mpe beno me mona Yawu, bidimbu mpe mambu ya ngitukulu, mpe me siamisama. Mpe nyonso yina Mfumu me tuba, me salama. Na yina, wapi dyambu awa, na ntangu mu ke kuwa ti ya kele na mindondo na kati ya beno, na ntangu mu ke kuwa ti ya kele na kuswaswana? Mu zola ti beno sonika yina kele dyambu ya beno, yina kele na ntima ya beno, mpe beno tula yawu na zulu ya chaire yayi, mbasi na nkokila.

287 Mu zola kumona samu na yinki dibuundu yayi lenda kunatama ve na Ngolo ya Nzambi, mpe mbotika ya Mpeve-Santu, na bidimbu mpe mambu ya ngitukulu. Wapi dyambu? Pasteur ya beno ke kwikila Yawu. Beno ke kwikila Yawu. Na yawu, yinki kele dyambu awa? Ya kele na kima ke na kutambula mbote ve. Yayi zolaka vwanda yinzo ya zulu ya mwinda samu na yinza. Yayi zolaka vwanda kisika yina Bangolo ya Nzambi, mpe kudila mpe kuzonza na ngolo, mpe kusosa Nzambi, zolaka landila na kukwenda, ntangu mpe mpimpa. Samu na yinki beto lenda kuzwa yawu ve?

288 “Mu zola, kasi beno zola ve,” tubaka Yesu. “Beno ke zola ve. Kukwiza mpe kusumba na Munu.”

289 “Mu zaba ti nge ke tuba,” Yandi tubaka, “nge kele ‘mwama, ke na nsatu ya kima mosi ve,’” ke na kuzonza na mabuundu. Yandi tubaka, “Nge ke tuba, ‘Mu kele mwama, mpe mu ke na nsatu ya kima mosi ve. Beto kele organisation ya kulutula nene.’ Mpe beno zaba ve, kasi beno kele muntu ya mawa, mputu, ya mpasi, ya kufwa meso, mpe ya kimpene, mpe zaba yawu ve.” Kana muntu kele na kisika yina mpe zaba yawu, yandi ke sadisa yandi mosi. Kasi, ntangu beno kele mutindu yina, “mpe beno zaba yawu ve!” Mpe Klisto tubaka ti mabuundu na kilumbu yayi ke vwanda mutindu yina, mpe ke zaba yawu ve.

290 Beno kanga ngolo moyo ya beno ya kimpeve, ya munu ya luzolo, mpangi ya munu ya luzolo. Beno kanga ngolo moyo ya beno, mutindu ya vwandaka, na kisambu, mpe beno tuba, “Mfumu Yesu, tala munu. Bika ti mu kukitala na nkokila yayi, ntete mu kwenda na mbeto, mpe kutala yina kele dyambu ya munu. Mu ke tuba ya me kuma bamvula, mpe mu ke mona ve bima yayi yina Yesu tubaka. Ti Yandi ke vwanda na munu, mpe bima yayi ke salama, mu ke mona yawu ve. Wapi dyambu, Mfumu Yesu?”

291 Beno vwanda ya kieleka. Beno vwanda ya kusungama. Beno kulumuka mpe beno zonza na Yandi, mutindu kizizi na kizizi na mpangi ya beno. Yandi ke monisa na beno. Yandi ke tuba na

beno. Beno buka moyo ya beno, mpe beno tula yawu kuna. Beno tuba, “Mfumu Yesu, kana ya ke lomba munu dibuta ya munu, kana ya ke lomba munu luzingu ya munu, kana ya ke lomba kisalu ya munu, kana ya ke lomba bumambele ya munu, kana ya ke lomba lukumu ya munu na mbanza, mu ke tambula na mwa bantu ya kyadi ya Mfumu.”

²⁹² Ntangu yayi beno bambuka moyo, Yesu tubaka, “Mwelo kele fioti, mpe nzila kele ya kuakangama, mpe kasi bantu fyoti kaka ke mona yawu. Samu ti nene kele Nzila ke nataka na lufwa.” Mafuka ya kulutila na mvula 1954, “Nene kele mwelo ke nataka na lufwa, mpe bantu mingi ke kotaka kuna.” Ya kele kieleka. “Yandi yina ke zimbisa luzingu ya yandi samu na luzolo ya Munu ke kuzwa yawu. Yandi yina ke zolaka tata, mama, mpangi ya kento, mpangi ya bakala, to kima yankaka, ya kulutila Munu, kele ya kulunga ve ti ba bokila yandi ya Munu. Yandi ke tula diboko ya yandi na kipusu mpe ke banda na kukwenda na ntwala, mpe kana yandi tala na manima, yandi kele ya kulunga ve samu na ntangu.” Bampangi!

²⁹³ Mosi ya bilumbu yayi, dilongi ya Mpeve-Santu ya nsuka ke kupakula ke longama. Mosi ya bilumbu yayi, munduki ya nsuka ke bula. Mosi ya bilumbu yayi, nkunga ya nsuka ke yimbama. Mosi ya bilumbu yayi, ba ke sambila kisambu ya nsuka. Mosi ya bilumbu yayi, myelo ya tabernacle ke kangama ya mbala ya nsuka, Biblia ke vwanda ya kukanga na chaire. Mpe beno ke telama na Ntwala ya Nzambi, samu na kupesa mvutu samu na yina beno me kuwa na nkokila yayi. Na yina yinki? Na yina yinki? Ntangu Buku ya nene ke zibuka, na yina yinki? Ntangu nkokila yayi ke vutuka na bande, na yina yinki? Oh, mutindu nkunga ke tuba:

Na yina yinki?

Ntangu Buku ya nene ke zibuka, na yina yinki?

Ntangu bayina mangaka Mvulusi bubu yayi,
Ba ke lomba bawu na kupesa kikuma—Na yina yinki?

²⁹⁴ Kisalu ya beno telemaka na nzila ya beno. Bibuti ya beno telemaka na nzila ya beno. Nkundi ya beno ya bakala telemaka na nzila ya beno. Nkundi ya beno ya kento telemaka na lweka. Dibuuundu ya beno telemaka na nzila.

Na yina yinki? Na yina yinki?

Ntangu Buku ya nene ke zibuka, na yina yinki?

Ntangu bayina ke na kumanga Nsangu yayi na nkokila yayi,
Ba ke lomba beno, na kupesa kikuma—Na yina yinki?

²⁹⁵ Yinki beno ke sala samu na yawu? Beno zaba yina kidimbu ya kibulu kele. Beno zaba yina kidimbu ya Nzambi kele. Yawu me tala beno.

Ti Mfumu kusakumuna beno, na yina beto ke telama.

²⁹⁶ Tata ya Mazulu yan lutondo, ti kyadi ya Nge mpe balusakumunu ya Nge kuvwanda na zulu ya bantu. Ti Mpeve ya Nge kusala. Mpe ti Mpeve-Santu ya Nge kukulumuka na zulu ya bantu yayi, mpe kupesa bawu, Mfumu, mbotika ya Mpeve. Ti bakala mpe kento nyonso, mwana ya bakala mpe mwana ya kento, na kati awa, ti ba natama na nkokila yayi, na nzila ya Mpeve-Santu, ti bawu ke tuba, “Nzambi, baka nyonso yina mu kele na yawu. Baka nyonso yina mu kele. Kasi, bika munu kusadila Nge, Mfumu ya munu. Mu ke tula nyonso na lweka. Mu ke bika munu mosi. Mu ke bika lunangu. Mu ke bika dibuundu. Mu ke pesa nyonso.”

²⁹⁷ Ve ti bawu fwana basika na dibuundu ya bawu, Mfumu, kasi bawu fwana basika na kondisyo na kati ya yina bawu ke na kuzingila. O Nzambi, vutula ba-Methodiste na dibuundu ya bawu, na tiya, samu na kulonga Nsangu ya mbote; vutula ba-Baptiste, vutula ba-Campbellites, vutula bantu ya Katolika. Mfumu Nzambi, basisa muntu na Branham Tabernacle awa, na tabernacle awa, na mpeve ya lembami, ya kulemvuka, yina ke kwenda mpe ke zona, mpe ke zola, mpe ke meka na kunata bantu na ntima mosi dyaka, samu ti Mpeve-Santu lenda kota mpe kusadila bantu. Tinda bidimbu ya nene mpe mambu ya ngitukulu. Kusa konso mukwikidi. Lemvokila disumu nyonso.

²⁹⁸ O Nzambi, beto ke mona bidimbu kumonika. Beto ke mona yinti ya fike kubasisa makasa ya yawu. Beto zaba ti ntangu me belama. Beto ke mona bombe yina kuvwanda kuna na maboko ya muntu ya kieleka yina Nge tubaka ti ya pesamaka na yandi muswa ya kubebisa yinza.

²⁹⁹ O Nzambi, wapi mutindu beto lenda manga dyaka? Wapi mutindu beto lenda? Ntangu, beto ke kuwa Nsangu ya Nge ya mbote ya kusakumuka kuwakana mbote-mbote, na mutindu ya mbote; kuwa Mpeve-Santu kutwadisa; kumona Mpeve-Santu kupesa bidimbu mpe mambu ya ngitukulu; kubelusa bambevo, kuzibula meso ya kufwa, kuvutula luzingu na bantu ya kufwa; mambu ya nene ya ngitukulu mpe bidimbu; Nsangu ya mbote kulongama na nzila ya bantu yina me longukaka ve, bantu yina me zaba kima mosi ve, kulongama na yisi ya Ngolo mpe kutalisama ya Mpeve-Santu; bidimbu mpe mambu ya ngitukulu kulanda dibuundu. Bambala yikwa dyaka!

³⁰⁰ Nge tubaka, “Kana beno zabaka Moise, beno zolaka zaba kilumbu ya Munu.” Aleluia! Mutindu mosi ya kele bubu yayi, Mfumu. Bawu ke mona mitindu nyonso ya bidimbu, ya bamvita mpe bampasi, mpe nyonso. Bika ti bawu balula bapaze ya Biblia ya ntama ya luzolo, mpe kumona kisika na wapi ndilu ya bakilometele beto kele. Beto me kuma na nsuka ya nsungi.

³⁰¹ O Nzambi, ningisa Mpeve ya Nge na zulu ya bantu yayi. Mpe na yina bawu ke katuka awa, na nkokila yayi, ti Mpeve-Santu kukwenda na bawu.

³⁰² Mpe mbasi na nkokila, Mfumu, ntangu beto ke kwiza na mbokolo ya nene yayi na autel yina beto ke na kukubikaka na kusala, beto ke sambila ti ba-autel kuvwanda ya kufuluka, ti bivinga ya bisambu ke vwanda ya kufuluka.

³⁰³ Mpe ti, na Lumingu na suka, Mfumu, mpe na Lumingu na nkokila, beto ke botika bantu awa landila Ndinga ya Nzambi. Mpe ti Mpeve-Santu kukulumuka na zulu ya maza yina, mpe kusala bidimbu ya nene mpe mambu ya ngitukulu. Pesa yawu, Tata.

³⁰⁴ Sakumuna pasteur ya beto ya luzolo awa. Sakumuna bamambe. Sakumuna banzenza na mwelo ya beto. Ti beto vutuka na yinzo na nkokila yayi mpe na kubanzaka na bima yayi na kati ya ntima ya beto; kuvutuka mbasi na nkokila, na kusepela, na kunataka na beto bambuma. Beto ke lomba na Nkumbu ya Yesu Klisto. Amen.

³⁰⁵ Mfumu Yesu Klisto kusakumuna mosi na mosi ya beno. Beno pesana mbote mosi na yankaka. Beno vutuka mbasi na nkokila, beno nata ndombolo ya beno mpe yina beno zola, mpe beno tula yawu na chaire. Ti Nzambi kupakula beno, kuvwanda na beno! Amen. Nzambi sakumuna beno.



KIDIMBU YA NZAMBI KNG54-0514
(The Seal Of God)

Nsangu yayi ya Mpangi William Marrion Branham, kulongamaka na Kingelesi, na Kilumbu ya tanu na manima ya midi, na kilumbu ya 14 ya Ngonda ya tanu, na mvula 1954, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org